

Baŋa na bini gba Polo pi omabhuka na gɔdɔ na
Kolito

© 2016 Wycliffe Bible Translators, Inc.

Licence - Creative Commons CC:BY-NC-ND

Balua na bini

gba Polo pi omabhuka na gudhu na

Kolito

Eli na kalanu

Balua na bini inde li Polo aye nani e pi okpala na Kolito-o, ani aye nani pindji ongu atsia makobho gba omakilisito di ne nabhuka inde ali bhú Piga gba Ebhe nani li Polo a'o e bhú gudhu na Kolito-o. Bhú nedhinga angoo, Kolito nani ne gudhu na ngbéngbé gba oGiliki inde li okpala ngangá apo bhula o bhú e-o, a ko 'ngbé gudhu na ndu doto na Akayi inde bhú nau na Loma-o . 'Li gudhu na Kolito au nani naali ka oehe na mase inde adu bhúbhú bhele-o, ne ka dasandu gba okpala angoo, ne engú na zabhe inde adu bhúbhú naali-o, a la di-e ongangá engú na ebhe inde abedhe nani bhúbhú bedhe-o. Engú na ngbéngbé inde li Polo adu agu gbele ne e, a ko engú nagbo bhusu o, engú na zabhe inde adu bhú Dadjua gba Ebhe-o, ne ongu inde u ayi e pindji bhoko ne olo, ne pindji naha lio, pindji bua nakpokpo kú 'ngú, pindji namene 'ngú li kúkú bhú Dadjua gba Ebhe, pindji ehe li Bu Bhobua ngaha e padhá, a la di-e pindji nazuku gba okpala-o. La, Polo atsia asuno imbilangu gba e ne nasuno lele maka li Bádha Ngali ngagama 'ngú li ongu angoo lie-o.

Alo na (13) inde ngasuno mukanda maka ehe na babadha naali inde li Ebhe ngaha e pi omaha e padhá-a, okpala mbila 'ngú pindji alo (13) ndjikpa ne ká bata-a naali ane oalo koko hana bhú bhuku inde. A ko engú inde li okpala ambila e ane mane bhú bhuku inde ngae.

Ongbengbe ongu inde bhú bhuku inde-e ngae inde:

Eli na kalanu 1:1-9

Nagbogbo bh̄us̄u o bh̄ú Dadjua gba Ebhe 1:10 – 4:21

Das̄and̄u na ndj̄indj̄i gba ̄l̄e ne bhoko, di ne piga gba e 5:1 – 7:40

Omakilisito a la di-e om̄apagano 8:1 – 11:1

M̄ukobho na Dadjua gba Ebhe a la di-e enḡú na Ebhe 11:2 – 14:40

Nazuku gba Kilisito a la di-e nazuku gba omabhuka 15:1-58

Naha makiso p̄i omakilisito na Yudaya 16:1-4

Enḡú nayi mayi a la di-e enḡú bhe na soso 16:5-24

1

Polo yi omabhuka na ḡudh̄u na Kolito mayi

¹ Ngama Polo, Ebhe a'ì ma bh̄ú nḡu e me ma kolo bh̄al̄u titima gba Yesu Kilisito . Ya aye bal̄u inde bh̄ú dabil̄i bini ne ndai ní Sosotene. ² Ya aye p̄i yi okp̄ala na Dadjua gba Ebhe inde bh̄ú ḡudh̄u na Kolito, ngayi okp̄ala inde li Ebhe a'o o kpi p̄i e. Yi akolo okp̄ala gba an̄i ka nabhuka Yesu Kilisito, bh̄ú dabil̄i bini ne nd̄u okp̄ala hana inde ngabh̄u 'li Ngámá gba ní Yesu Kilisito ne nd̄u bil̄i hana-o. Yesu ne Ngámá gba uo, a ko la di Ngámá gba ní-o. ³ Bádha bh̄ú 'bu ne guo 'nḡú gba 'Dyi ní Ebhe di ne Ngámá gba ní Yesu Kilisito-o d̄u ne yi bh̄ú dabil̄i bini.

Obabadha 'nḡú inde li Ebhe aha e p̄i okp̄ala na Kolito bh̄ú bádha bh̄ú 'bu gba e-o

⁴ Ma ngagie heni p̄i Ebhe nd̄u nedh̄inga hana nḡubula yi kabula bádha bh̄ú 'bu inde an̄i aha e p̄i yi li kpadj̄i gba Yesu Kilisito-o. ⁵ Bh̄ú makp̄ets̄e gba yi ne Yesu Kilisito-o, Ebhe abedhe yi ne nd̄u obabadha onḡú hana. Kaka-a, yi mb̄ila nadi mabelu li eli gba an̄i-e ndj̄indj̄i, a la di bh̄ú 'ndj̄i yi ne im̄bilanḡu bh̄ú nd̄u 'nḡú hana. ⁶ Ngali gba Yesu Kilisito inde ya akpokpo e p̄i yi-e, asia dabil̄i li bua yi ndj̄indj̄i. ⁷ Kaka-a, yi asia nd̄u 'he hana inde li Ebhe ngaha e p̄i okp̄ala bh̄ú bádha bh̄ú 'bu gba e-o, ngayi okp̄ala inde ngadjeke ekp̄í li Ngámá gba ní Yesu Kilisito asúno matá lie lie p̄i okp̄ala-o. ⁸ An̄i atéteke yi ngae me yi l̄u kpekpeke akólo li soso, amba kp̄ala bini ad̄ú ne enḡú na sisiti napapa li yi de, li 'kp̄í li Ngámá gba ní Yesu Kilisito agó lie-o. ⁹ Ebhe gba ní-e djidji 'li e de. An̄i a'ì yi me yi kp̄ets̄e

liyi ne Ndili gba ni Yesu Kilisito, Ngámá gba ní-o, ani djí 'li e bhom̄-o de.

Omakilisito na Kolito agbogbo bh̄us̄u o

¹⁰ Ondaise ma, ma ngakikiliki lima pi yi ne 'li Ngámá gba ní Yesu Kilisito me, yi d̄a nd̄a yi hana ne koli bua bini, yi agbógbo bh̄us̄u yi de. Yi gbite 'ngbo yi bini ne nad̄a ne mabhundja bini di ne nabhuka bini. ¹¹ Ondaise ma, ma pa mo-o padhá de, a ko anga okpála na piga gba Koloe apa m̄uma me yi ngadje liyi ade. ¹² Engú ma apa e bhom̄-o, ma apa anga s̄unda yi-e, yi ngagbogbo bh̄us̄u yi. Okpála koko ngapa me o ngakpata Polo. Okoko ngapa me o ngakpata Apolosi.† Okoko ngapa me o ngakpata Piele. Okoko ngapa me o ngakpata Kilisito. ¹³ Engú yi ngamene e mana m̄ugito me Kilisito agbo bh̄us̄u e magbo. Yi pa nga m̄uma, u agi nani ma Polo li kulusi ngú nakobho yi uu? Yi asia nani batisimo ne 'li ma Polo? A mo-o ade.

¹⁴ Ma ngagie heni pi Ebhe anga ma batisa kpála bini bh̄ú ka yi de. Ma abatisa bha bini Kilisipusi ne uo ne Gayusi† ¹⁵ Kaka-a, kpála bini ti da napa de me u abatisa yi ne 'li ma-a de. ¹⁶ A ko paká! Ma abatisa di nani piga gba Setefanasi.† Engú bini, ma ziba de me ma abatisa kpála koko uu-o de. ¹⁷ Padhá de, anga Kilisito tima nani ma ngú nabatisa okpála de. Engú bini, ani atima ma ngú nakpokpo Bádha Ngali pi uo. Ma ngakpokpo Bádha Ngali ango-o ne mabelu má p̄a p̄a maka okpála koko ade. Li ma d̄ú nakpokpokpo ne mabelu maka okpála koko-o, nakpi gba Kilisito li kulusi-e de matá ne tata ade.

Yesu Kilisito pi ní ne angu di ne imbilanḡu inde ayie ka Ebhe

¹⁸ Padhá de, anga pi okpála bhende li kpadji na ngita-a, nakpokpo ngali p̄indji nakpi gba Yesu li kulusi-e, a ko 'ngú na pele. Engú bini, pi ní obhende li Ebhe ngakobho o-o, ní ngau angu gba Ebhe-e bh̄ú ngali ango-o. ¹⁹ A maka u aye lie bh̄ú Bhuku gba Ebhe-e me:

†1:12 Tsia bh̄ú 1 Kol. 16:12, di ne bh̄ú Kul. 18:24-28.

†1:14 Tsia bh̄ú Kul. 18:8, 19:29.

†1:16 Tsia bh̄ú 1 Kol. 16:15-17.

«Ma améne me imbilangɔ gba obhɛlɛ imbilangɔ-o kolo padhá.

Ma aú imbilangɔ gba uo bhú djila ma maka ehe
na padhá.†»

²⁰ I dɛ me Ebhe nde apa mo-o, a akɛnda napa me, okpála na imbilangɔ na doto inde-e, imbilangɔ gba uo bhɛ 'ngú de. Okpála inde ngasuno olíli gba omaYuda-a, tata li nasuno gba uo ade. La di-e, obhɛlɛ nadi mabelu na sukɛ inde-e, mabelu gba uo-o, tata tété ade. Ebhe asuno bhomɔ-o me imbilangɔ na doto inde-e padhá.

²¹ Padhá de, anga okpála na doto ne imbilangɔ gba o na kpála-kɛti-e ti da nani nambila imbilangɔ gba Ebhe-e de. Kaka-a, li kpadji na engú inde li okpála ngau e bhú djila o maka engú na pele-e, Ebhe au ndjindji me ni kobho okpála inde ngabhuka-o. Engú na pele ango-o, a ko Bádha Ngali inde ya ngakpokpo e-o.

²² OmaYuda ngayo ongamba 'ngú kala me u bhuka, oGiliki naao ngagili imbilangɔ. ²³ La pi ya-a, ya ngakpokpo 'ngú gba Kilisito inde u agi e li kulusi-o. Li omaYuda ngadje engú ango-o lie, a ngangbingi 'ndji uo mangbingi. Li okpála bhende ne omaYuda ade-e ngadjedje lie, a ngamene uo maka engú na pele.

²⁴ Engú bini, pi okpála bhende li Ebhe alo o-o, i dɛ di-e omaYuda, i dɛ di-e obhende ne omaYuda ade-e, u ngambila ndjindji me Yesu Kilisito akolo pi o angu di ne imbilangɔ inde ayie ka Ebhe-e ngae. ²⁵ Okpála koko ngapa me engú li Ebhe amene e bhú nakpi ka Yesu-o, a ko 'ngú na pele. Engú bini, engú inde u a'i e me a ko 'ngú na pele bhomɔ-o ane imbilangɔ gba kpála-kɛti mane. I dɛ me u nde ngabhundja me Ebhe bhɛbhɛkɛ-o, a mo-o ade. Padhá de, anga bhɛkɛ gba Ebhe-e ane angu gba okpála-kɛti ne kpéke.

Ebhe nga'o tata li ehe inde li okpála ngau e bhú djila o padhá

²⁶ Ondaise ma, ngayi okpála li Ebhe a'i o-o, yi bhundja nga me yi ne oda-ie! Nakpata mabhundja gba okpála na doto-o, okpála na imbilangɔ, ne obhende na angu, ne obhende azu lio bhú piga na tia bhú ká yi bhelé ade. ²⁷ Engú bini, Ebhe alo engú li okpála na doto nga'i e me a ko engú na pele-e ngɛbula me imbilangɔ gba obhɛlɛ imbilangɔ-o kolo ehe na padhá. Ani alo ongú bhende li okpála na

†1:19 Tsia bhú Isa. 29:14.

doto ngau e me angu bhúbhú ade-e ngúbula me angu gba bhú angu-o kolo ehe na padhá. ²⁸ Aní alo ohe inde lí tata nde lie e ade, inde lí okpála na doto ngam e, inde u ngau e bhú djila o padhá-o. Aní alo ngúbula me ní bhili ohe bhende lí okpála ngau e me a tété ne tata-a ne di.

²⁹ Kaka-a, kpála bini tí da nadjé kúte e kala Ebhe de. ³⁰ La ngayi-e, Ebhe akpétse yi bhú dabilí bini ne Yesu Kilisito. Aní amene me Yesu kolo pí ní imbilangú inde ayie ka ní-o. Yesu amene ngae me ní kolo ngbingbili bhú djila Ebhe. Aní amene me ní dè libhomu pí Ebhe. Aní atsia agbegbe di ní bhú bali gba siti. ³¹ Kaka-a, a maka u aye lie bhú Bhuku gba Ebhe-e me: «Í dè me kpála nde akúnda nau lie ngbéngbé-e, aní de u lie ngbéngbé bhú engú lí Ngámá Ebhe amene e ko.†»

2

Imbilangú lí Polo adú akpokpo 'ngú pindji Yesu Kilisito ne e-o

¹ Ondaise ma, ngama makpe-e, nedhinga ma ané nani lie agba yi ngúbula nakpokpo engú inde lí Ebhe ambamba ta e lí kpadji gba Kilisito-o , ma di pí yi mabelu bhe nane mane de. Ma gama di 'ngú pí yi ne imbilangú naali de. ² Padhá de, anga nedhinga ma adú lie agba yi-e, ma gili nambila engú koko bhú ka yi de. Ma agili bha bini nambila Yesu Kilisito, ma agili bha nambila makpe me-e Yesu Kilisito inde u agi nani e lí kulusi-o. ³ Kaka-a, ma adú agba yi bhúkú kpála, ma adú ne tsulé, ma atsia adú di nagúkú naali. ⁴ Bhú nasuno gba ma-a ne bhú nakpokpo Bádha Ngali-e , ma dè nagama 'ngú ne imbilangú gba kpála-kúti de, ma dè di nadi pí yi mabelu de. Engú bini, Bua gba Ebhe-e adú nani nasuno pí yi ne angu me engú ma adú akpokpo e adú kúkú 'ngú. ⁵ Ma adú akpokpo 'ngú pí yi mo-o ngúbula me yi a'ó nabhuka gba yi-e bhú imbilangú gba okpála de, engú bini yi 'o mangbo bhú angu gba Ebhe-o.

Imbilangú lí Polo ngakpokpo 'ngú ne e ayie ka Ebhe

⁶ Nedhinga ya ngasuno lie pí okpála inde abhele lí kpadji gba Ebhe-e abhele-e,

†1:31 Tsia bhú Djlm. 9:22-23.

ya ngasuno kùkùlù imbilangù, a ko imbilangù na doto inde-e de. A ko la di bhende gba ongámási na doto inde li 'bhè ngámá gba o andjía mandjia de.

⁷ Imbilangù ya ngakpokpo 'ngù ne e inde-e, a ko mangbo imbilangù gba Ebhe. A ko ehe inde awo lie mawo, inde li okpála dù nani nambila e de. Kala me Ebhe bho doto-o, Ebhe a'o nani imbilangù ang-o ngùbula me ní sia té sangu gba ni-o.

⁸ Ongámási na doto inde-e mbila nani imbilangù ang-o de. I dù me u mbila nani uu-o, u de bhèlè nani Ngámá gba ní inde abedhe ne sangu bedhe li kulusi de.

⁹ Ehe li Ebhe amene e, a maka u aye lie bhù Bhuku gba ani-e me:

«Engù inde li djila okpála u nga nani e de-e,

li 'dje okpála dje nga nani e de-e, di ne bhende li okpála bhundja belegù engù li e de-e, a la bhomù-o engù inde li Ebhe aleke nani e pi okpála inde ne mukùnda pi ani-o.†»

¹⁰ Pi ní-e, Ebhe ambamba ta engù ang-o bhù angu gba Bhobua gba e-o. Bhobua ang-o mbila ndù 'ngù hana. Ani mbila belegù mabhundja gba Ebhe inde awo lie mawo-o. ¹¹ Bhù ká okpála-a, a ko da inde ambila engù inde bhù kilí e? A ambila bha bini ne bua inde bhù kpála ang-o. A bhadi moko, engù inde bhù Ebhe-e, ambila bha bini ne Bhobua gba Ebhe-o. ¹² Pi ní-e, Bua inde bhù ní-e yie ka okpála na doto inde-e de, engù bini, a yie ka Ebhe. Ebhe aha pi ní ngùbula me ní mbila ndù 'he inde ani aha e pi ní bhù bádha bhù 'bu gba e hana. ¹³ Nedhinga ya ngakpokpo 'ngù lie pi okpála-a, ya ngakpokpo ne imbilangù gba okpála ade. Engù bini, ya ngakpokpokpo ne imbilangù inde ayie ka Bhobua gba Ebhe-o. A akùnda napa me, ya ngambamba ta ongù pindji Bhobua gba Ebhe-e pi okpála inde li Bua ang-o nde bhù o-o.^a

¹⁴ Kpála bhende li Bhobua gba Ebhe-e nde bhù e ade-e ti da naziba obisagu inde li Bhobua ang-o ngaha e pi okpála-a de. Bisagu ang-o pi ani maka engù na pele. Imbilangù ngù nambila 'ngù ang-o bhù 'ndji ani ade. Padhá de, anga Bua gba

†2:9 Tsia bhù Isa. 64:3, 52:15.

^a2:13 Li bilí inde-e, u tí da di napa me: «Ya ngakpokpo engù pindji Bhobua gba Ebhe-e pi okpála ne oeli inde ayie ka Bhobua ang-o.»

Ebhe-e ti da nambamba ta 'ngú angó-o bha pi kpála ngae. ¹⁵ Kpála inde li Bua gba Ebhe-e nde bhú e mbila ndu 'ngú hana, bhende na babadha, ne bhende na sisiti. Engú bini, ngaani-e, kpála bini ti da nambila 'ngú inde bhú ani-e má kpulukutu de. ¹⁶ A maka u ye lie bhú Bhuku gba Ebhe-e me:

«Kpála bini mbila engú inde li Ebhe Ngámá ngabhundja e de.

Kpála bini ti da naha líli pi ani de.†»

Engú bini, ngaya okpála li Bua gba Ebhe nde bhú o-o, nambhundja gba ya viti ne bhe gba Kilisito bini.

3

Omabhuka na gudhu na Kolito maka okpála inde ngakpata Yesu na mbia

¹ Ondaise ma, pi ma-a, nedhinga ma adu lie agba yi-e, ma ti nani da nagama 'ngú pi yi maka okpála li Bua gba Ebhe-e nde bhú o-o de. Engú bini, ma agama bha ibili 'ngú pi yi maka okpála na doto inde. Padhá de, anga yi adu maka okpála inde i ngakpata nga Yesu Kilisito na mbia. ² Ongú inde ma asuno e pi yi-e adu maka miliki. A adu ezu na kpekpeke de. Belegu pi mbia inde-e, yi ti nga da nazu ezu na kpekpeke de. ³ Padhá de, anga yi nga bha ngakobho maka okpála na doto inde, anga yi ngamene 'he liyi sunda yi ne 'ngbé bua. Yi la di ngatsi sunda yi. I da me yi nde ngamene mo-o na paká-a, yi mbila de me bhobhomu-o ngasuno me yi nga bha ngadhuku maka li kute yi akunda lie di? ⁴ Nedhinga li kpála bini bhú ká yi ngapa lie me ni ngakpata Polo-o, li kpála koko pa me ni naani ngakpata Apolosi-e, asuno me yi ne okpála inde na doto. A mo-o adi?

Ebhe ne Ngámá na kulu gba ní-e ngae

⁵ Apolosi ne da? Polo la di ne da? Ya bha ne obalise gba Ebhe inde ani atima o ngú nakpokpo eli gba e pi yi, ngabula me yi bhuka Ngámá Yesu Kilisito. Kpála ne kpála bhú ká ya bha ngamene kulu inde li Kilisito aha e pi ani-o. ⁶ Ya adu maka okpála nalu nguwa. Ngama-a, ma akpo lita nakpokpo eli gba Ebhe-e bhú ká

†2:16 Tsia bhú Isa. 40:13.

yi maka kpála inde ngalu nguwa. Apolosi anɛ ne di ne kalanɛ maka kpála inde ngabolo 'ngu pí 'zɛ-o. Engú bini, Ebhe amene ngae me ezɛ ango-o bhele.

⁷ Bhobhomɛ-o asuno me, ne kpála inde ngalu nguwa, ne bhende ngatuko 'ngu pépé-e, tetele kpála bhú ká uo ade. Engú bini, kpála na tetele mangbo ne Ebhe, anga ani ngamene ngae me ezɛ-o bhele. ⁸ Ne kpála inde ngalu nguwa, ne bhende ngatuko 'ngu pépé-e, u viti bini. Ebhe ahá makalá na kulu gba kpála ne kpála-a pí e li lele kulu gba e-o. ⁹ Ndɛ ya bhisi hana, ya ngamene kulu gba Ebhe-e bhú dabilí bini. Ngayi-e, yi maka edyi gba Ebhe.

Yi la di maka eti li Ebhe ngayiki e-o. ¹⁰ Bhú bádha bhú 'bu gba Ebhe-e , Ebhe aha angu mɛma, ma atsia aholo namene kulu gba ani. Ma adɛ maka kpála nayiki eti ne imbilangɛ, inde ambila di nabanga 'dɛ 'ti-e ndjindji, kpála na kulu koko atsia ago ngú nadyudyo kulu ango-o ne kalanɛ. A ayo me kpála ne kpála inde nga'o biliki pí 'dɛ 'ti ango-o, 'o li lelele. ¹¹ 'Dɛ 'ti ango-o, a ko Yesu Kilisito inde yi nga'o nabhuka gba yi-e bhú e-o. Kaka-a, kpála bini ti da na'o matá 'dɛ 'ti koko de. ¹² Pí 'dɛ 'ti ango-o, okpála koko ngayiyiki ne tia kulu inde ngabhue mabhue maka olo, aladja di ne teme na mase naali. Okpála koko ngayiyiki ne tia kulu inde i bhúe de maka ndula, ulu di ne soli.

¹³ La-a, li 'kpí li Ebhe akódho 'ngú gba okpála na doto lie-e, kulu gba mɛsuno bini ne bini akóto bhú mbasɛ. Okpála aú kulu gba uo-o mbámhá. Padhá de, anga li kpí ango-o, Ebhe alé kulu gba kpála ne kpála bhú djua ngú nambila me ne me a ndjindji, ne me a sisiti. ¹⁴ I dɛ me kulu inde li kpála amene e nde tsi bhú djua de-e, li Ebhe há makalá pí kpála ango-o. ¹⁵ Engú bini, i dɛ me kulu inde li kpála amene e nde atsi bhú djua-a, Ebhe há makalá pí ani de. Ebhe akóbho kpála ango-o makobho, engú bini, kpála ango-o ave kuku, ani de atsi bhú djua atsi.

¹⁶ Yi mbila de me yi maka Eti gba Ebhe, di ne me Bua gba ani-e ngadɛ bhú yi-e di? ¹⁷ I dɛ me kpála nde abhɛlɛ Piga gba Ebhe-e, li Ebhe bhɛlɛ di kpála ango-o. Padhá de, anga Ebhe a'o Dadjua ango-o pí e. Piga inde ani ngadɛ bhú e-e, a ko yi.

Imbilangɛ gba Ebhe-e kpi ne imbilangɛ gba okpála-kuti

¹⁸ Kpála bini apíte lie de. I dɛ me kpála bini bhú ka yi nde ngabhundja me ni ne

imbilangu maka okpála na doto inde-e, ani de yala imbilangu gba e bhomu. Ani kolo mangbo bhú djila okpála na doto maka bhulu pele, amba ani sia imbilangu na kuku. ¹⁹ Ma pa mo-o padhá de, a ko anga oehe li okpála na doto nga'i e me a ko imbilangu-o, a ko ongu na pele bhú djila Ebhe. A maka u aye bhú Bhuku gba Ebhe-e lie me:

«Ebhe ngaholo okpála i ngabhi 'kpa o pi mbulu o me
o ne obhulu imbilangu bhú oeli na kali gba o-o.†»

²⁰ U aye di matá bhú bhuku gba Ebhe-e me:

«Ebhe mbila mabhundja gba okpála inde ngabhi 'kpa o pi mbulu o me
o ne obhulu imbilangu-o hana.

Ani mbila hana me a padhá.†»

²¹ Kaka-a, ma apa pi yi me kpála bini bhú ka yi abhi 'kpa e pi mbulu e bhú nakpata musuno de. Padhá de, anga ndu 'he hana ne naayi. ²² Ne ma Polo, ne Apolosi, di ne Piele-e, ya ndu ya hana ne naayi okpála. Belegu doto, ne mukobho di ne kuo ne naayi 'he. Ongu na naki inde di ne ongu agó galikpe bhadi ne ndu naayi 'he. ²³ Engu bini ngayi-e, yi ne okpála ka Yesu Kilisito, Yesu Kilisito ne kpála ka Ebhe.

4

A ayo namanga obhulu titima gba Yesu-o mamanga

¹ A ayo me okpála mbila me, ngayi, obhulu titima gba Yesu Kilisito-o , ya ne okpála na kulu gba ani. Ebhe a'o ongu inde nani awo lie mawo-o sakpa ya ngubula me ya suno pi okpála. ² Yi mbila ndjindji me, engu inde u ngayo e ka kpála inde u a'o 'he sakpa e, a ko nandu ngbingbili . ³ La pi ma-a, belegu ngayi-e, yi pa me ma ne siti kpála, ne me ma ne siti kpála ade-e, a méne 'he bini ngu ma de. Abana li okpála nakodho 'ngu-o pa me nganda kulu gba ma-a a ndjindji, ne

†3:19 Tsia bhú Dj. 5:13.

†3:20 Tsia bhú Ets. 94:11.

me a ndjindji ade-e, a méne 'he bini ngú ma de. Abana ngama makpe, ma pa de me nganda kulu gba ma-a ndjindji, ne me a sisiti-e de.

⁴ Padhá de, anga pi ma-a, bua ma pa muma de me ma ngamene siti 'ngú-o de. Engú bini, bhobhomu-o kunda napa de me ma mene siti 'ngú de-e de. Ngámá Ebhe akódho mangbo engú gba ma-a ngae. A akódho ne kpála koko de. ⁵ Kaka-a, yi akódho 'ngú gba okpála koko de. Yi djeke mangbo me nedhinga li Ebhe a'o e ngú nakodho 'ngú gba okpála kolo paká. A ko okpí li Ngámá Yesu agie lie lie-o. Li 'kpí ang-o, ani apándja ondu 'ngú hana inde awo lie naki mawo-o bhú mbasu. Ani agbé engú inde li okpála nde ngabhundja e li bua o-o li zi 'kpí. Ekpí ang-o, li Ebhe tsia dhégo kpála ne kpála li lele kulu gba e-o.

⁶ Ondaise ma, ma apa ongú bhomu-o pi yi pindji ya ne Apolosi ngubula nateteke yi, amba yi mbila ongú inde bhúbhú-o. Ma akunda me yi kpata nganda ya ngubula me yi kə mboli gbitaku inde-e me: «A ayo napise li kozie inde u a'o e-o.» A ayo de me kpála bini bhú ká yi sia 'ngbé 'ndji ne 'ili me ni naani ne kpála ka tsipakala, amba ani u okpála koko bhú djila e padhá-a de. ⁷ Ngamu kpála inde ngabhundja me ni ane okpála koko mane-e, mu naamu ne da? Ebhe ha ndu 'he inde ka mu-o hana pi mu ngae di? I du la me Ebhe nde aha pi mu ngae, mu ngamene 'ngbé 'ndji tété mugito me mo osia ka angu gba mu-o ka ni?

'Ngbé 'ndji gba omabhuka na Kolito

⁸ A ndjindji, anga yi asia naayi ndu 'he hana inde li Ebhe ngaha e asia. Yi ibili ne obhulu tia li kpadji na nabhuka . Yi ngapa me yi ndu yi hana ne ongámási, la ngaya obhulu titima gba Yesu Kilisito-o, ya naaya ne ongámási ade. I dú me yi du bhú djila Ebhe ne ongámási na paká-a, a de ndjindji ngubula me ni u ne yi bhú dabili bini. ⁹ Ya ne obhulu titima gba Yesu Kilisito. Engú bini, ma ngau mugito me Ebhe a'o ya asidi pita ndu okpála koko hana. Ya maka okpála bhende u akodho 'ngú gba o, inde u abhíli o kala ndu okpála hana. A akunda napa me doto libhomu ne okpála-kuti la di ne oandjelu ngatu 'ue bhú 'ndji ya maka bhú da ngeme.

¹⁰ Ngaya-a, ya ne obhulu pele kabula 'li Yesu Kilisito! La ngayi-e, yi ne obhulu

imbilangụ kabula aní! Ngaya-a, ya ne okpála li angu nde bhú o ade! Engú bini, ngayi-e, yi ne okpekpeke okpála! Ngaya-a, okpála ngau ya bhú djila o padhá, engú bini, ngayi-e u ngamanga yi mamanga! ¹¹ Nakolo pí mbia inde-e, ya ngadje gụmụ di ne gụmụ 'ngu. Ya ngadyi obongo inde akadha. U ngato mbolo li ya. Ya sili kúti de. ¹² Ya ngamene kulu ne 'kpa ya kpekpeke. Nedhinga li okpála ngasobho ya lie, ya ngayo Ebhe me aní tuko bisagu pí uo. Nedhinga li okpála ngato mbolo li ya lie, ya ngakikibila, ya gisila de. ¹³ Nedhinga li okpála ngapa 'ngú gba ya lie sisiti-e, ya ngagie pí uo bhụkụ eli. Ya akolo maka oehe inde u abala e apí 'ká. Nakolo pí naki-e, ya akolo maka oehe inde li tata nde lie ade.

Polo asuno bua gba e na 'dyi ongisi-e pí omabhuka na Kolito

¹⁴ Ma ye engú inde-e de me yi sia nụmụ ká engú inde yi ngamene e de. Ma aye mangbo ngụbula me ma ha líli, anga yi ne ongisi gba ma na mụkụnda. ¹⁵ Padhá de, anga abana li omụsuno dụ bha ka yi bhelé-e li kpadji gba Yesu Kilisito-o, koli 'dyi yi bha bini. 'Dyi yi ang-o, a ko ma. A akụnda napa me ma akpo lita nakpokpo Bádha Ngali gba Yesu Kilisito pí yi ngama. ¹⁶ Ma nde lie ne 'dyi yi-e, ma ngayo ka yi me yi mene engú inde ma ngamene e-o. ¹⁷ Ngụbula nateteke yi-e, ma atima Timoté agba yi oo. Ma atima aní ngụbula me aní nụ suno pí yi ne toto lele maka ma ngadhụkụ lie li kpadji gba Yesu Kilisito-o. Ongú inde aní asúno e pí yi-e, a bhomụ-o ongú inde ma susuno e pí okpála gba Ebhe ne ndụ bili hana-o. Yi dje Timoté, a ko ndili gba ma na mụkụnda-o. Aní la di ngadhụkụ ngbingbili li kpadji gba Ngámá Yesu Kilisito.

¹⁸ Okpála koko bhú ka yi ngabhi 'kpa o pí mbulu o anga u ngabhundja me ma agó matá gba yi oo de. ¹⁹ Engú bini, i dụ me Ngámá gba ní-e nde aziba-a, ma agó oo ne 'kpí bhisi inde. Li ma kolo oo, ma ú obhụlụ 'ngbé 'ndji bhomụ. Ma tsia mbila ne me u bha ngape 'li o padhá, ne me abhú uo ne angu namene engú.

²⁰ Padhá de, anga Naụ gba Ebhe-e ne eli ade, a mangbo bhú angu gba Bu Bhobua .

²¹ Nedhinga ma agó lie agba yi-e, yi akụnda me ma go ne mangua 'ngú dho? Yi akụnda me ma ago sakpa ma ne fimbo? Ne me ma go ne bhụkụ bua ngú nasuno

pi yi me ma kunda yi naali?

5

Polo apa pi omakilisito me u gbe kpála inde amene siti 'ngú bhú ka o magbe

¹Ma ngadje ngali gba yi-e ndu 'kpí hana. Okpála ngapa me bhú ká yi-e, okpála koko ngadhukú ne olisi, i du di-e ne obhosi ngangá. A ko engú inde belegu okpála i bhuka Ebhe de-e ti da namene e de. A mana mágito me saka yi bini ngadhukú ne wala 'dyi e.[†] ²Ngayi-e, engú ango-o ngaha pi yi 'ngbé 'ndji. A ayo la igini me yi de aku 'gbá ngubula siti 'ngú ango-o. A ayo la di igini me yi gbe ngua makilisito bhomu-o bhú ká yi magbe.

³Ngama-a, belegu ma nde lie bhú ka yi ade-e, bua ma ne yi bhú dabili bini. Ma akodho engú gba kpála inde amene engú bhomu-o akodho mágito me ma ne yi bhú dabili bini. ⁴Ma akodho 'ngú bhomu-o ne 'li Ngámá gba ní Yesu. Ma ngapa pi yi me, yi po bhúla yi-e, li bua ma dú ne yi bhú dabili bini. Li angu gba Ngámá gba ní Yesu tsia súno di lie. ⁵Nedhinga yi apó bhúla yi lie, yi pu kpála bhomu-o pi Satana^b ngubula me siti 'ngú inde bhú ani-e koto hana má kpəkəbhə, amba Ebhe kobho bua ani li 'kpí li Ngámá gba ní Yesu agó lie ngú nakodho 'ngú gba okpála-o.

⁶A ndjindji ade me yi bhi 'kpa yi pí mbulu yi li siti 'ngú bhomu-o de. Yi mbila de me mboye ku levile bedi-e ngamene ngae me faline libhomu fuka di-i? ⁷Yi 'e siti 'ngú bhomu-o bhú ka yi ma'e. I du me yi nde amene mo-o, yi kolo bubu maka faline inde u 'o levile bhú e de-o. Ma ambila ndjindji me Ebhe amene me yi kolo bubu li kpadji nakpi ka Yesu Kilisito . Yesu maka ndili kandələ inde u abhələ e ngubula me okpála zu bhú anokomia na Pasika . ⁸Kaka-a, ní kpi djali kabula li Ebhe agbegbe ní lie bhú bali-o. Ní 'e osisiti 'ngú gba ní-e maka li omaYuda a'e

[†]5:1 Tsia bhú Lev. 18:8, di ne bhú Det. 23:1.

^b5:5 *Napu kpála pi Satana*: Ti da napa li bili inde-e me nagbe kpála bhú Piga gba Ebhe.

nani dili levile gba o lie ngubula nazu anokomia nazu mapa inde li levile nde bhú e ade-o . Ní mene mo-o, ní dǎ bubu, di ngbingbili kala Ebhe.

⁹ Bhú balua ma atima nako e pi yi kalanu-o, ma apa pi yi bhúbhú me yi adú bhú dabili bini ne okpála inde ngadhuku ne olisi, i dǎ di-e ne obhosi ngangá-a de.

¹⁰ Ma pa engú bhomu-o pi yi pindji ndu okpála na doto inde-e hana de. Ma pa engú bhomu-o pindji okpála inde ngadhuku ne olisi, i dǎ di-e obhosi ngangá-a de, ne pi obhende li gumu 'he gba okpála abedhe bhú o bedhe-e de. Ma pa la di engú bhomu-o pindji okpála inde ngazi 'he-e de, i dǎ di-e obhende ngadhogo ebhe na eu-o de. Li kpála kanda nandu bhú dabili bini ne okpála bhomu-o de-e, kpála ango-o de yie pila doto mayie.

¹¹ Ma akanda mangbo nayoko yi me, yi akpétse liyi ne kpála inde ngapa me ni ne makilisito me ani nde ngadhuku ne olisi, i dǎ di-e ne obhosi ngangá-a de. Yi akpétse liyi ne omakilisito bhende li gumu 'he gba okpála abedhe bhú o bedhe-e de. Yi akpétse liyi ne omakilisito bhende ngayo ebhe na eu-o de, i dǎ di-e makilisito inde ngasobho okpála koko, ne obhende ngalangba ne pandi, i dǎ di-e bhulu 'zi-e de. Yi akpétse liyi ne uo de. Yi azú 'he ne ngua kpála bhomu-o belegu de bini. ¹²⁻¹³ Padhá de, anga a ko 'ngú ka ma de me ma kodho 'ngú gba okpála inde ne omakilisito ade-o. Ebhe akódho 'ngú gba uo-o ngae. Engú bini ngayi-e, yi ti da nakodho 'ngú gba omakilisito yi nde ne o-o. Maka u aye lie bhú Bhuku gba Ebhe-e me: «Yi gbe kpála inde ngamene siti 'ngú bhú ká yi-e magbe.†»

6

Lele naleke 'ngú sunda omakilisito

¹ I dǎ me saka yi nde ne 'ngú sunda o ne ndai e-e, lele pi ani tí da nandu lie ne di kala ongámasi na doto? A ayo mangbo igini me ani nu ne ani kala okpála gba Ebhe. ² Yi mbila de me okpála gba Ebhe-e akódho 'ngú gba okpála na doto li

†5:12-13 Tsia bhú Det. 17:7.

sokpí-e ngao di? I dɛ la me yi nde akódho 'ngú gba okpála na doto-o, lele pi yi tí da nakodho odjedje ongú inde-e lie de-e? ³ Yi mbila de me ní akódho belegu engú gba oandjelu-o nganí-e di? Ka ni la ní tí da nakodho odjedje 'ngú na naki inde-e lie de? ⁴ Li odjedje 'ngú dɛ sɛnda yi-e, ka ni yi nganɛ lie ne di kala okpála inde bhú Piga gba Ebhe-e ade-e? ⁵ Ma ngapa 'ngú bhomɛ-o ngɛbula me yi sia nɛmɛ. Kpála na imbilangu bini bhú ka yi adi ngɛbula me ani leke 'ngú sɛnda omakilisito-o? ⁶ A bha ndjɛ ndjindji me li makilisito dɛ ne engú sɛnda e ne makilisito-o, u de nɛ ne di kala okpála inde i bhuka Yesu di?

⁷ A na paká me nadɛ ne engú sɛnda yi-e, a bhomɛ-o nɛmɛ na ngbéngbé. I dɛ me u nde mene ngbili 'ngú li pabili gba yi-e de-e, u nde ngazi 'he gba yi-e, ka ni yi tí da nakikibila lie ne 'ndjá bua de-e? ⁸ Engú bini, okpála inde i mene ngbili 'ngú pi okpála koko de-e ne yi! Yi la di ngazi 'he gba ondaise yi omakilisito!

⁹ Yi mbila na paká me okpála inde ngamene osisiti 'ngú-o lí bhú Naɛ gba Ebhe-e de. Yi apíte liyi de, okpála inde ngakɛnda olisi, i dɛ di-e ne obhosi ngangá-a, ne obhende ngadhøgø oebhe na eu, ne obhende ngakɛnda olisi, i dɛ di-e obhosi gba okpála koko, i dɛ di-e obhende ngakɛnda lio sɛnda o maka ølø ne bhoko, u li bhú Naɛ gba Ebhe-e de. ¹⁰ Yi apíte liyi de, obhɛɛ 'zi, ne obhende li gɛmɛ 'he gba okpála abedhe bhú o bedhe, ne obhende ngalangba ne pandi, ne obhende ngadi okpála koko, ne obhende ngagbɛɛ 'he gba okpála ne kpéke djila-a, lí bhú Naɛ gba Ebhe-e de. ¹¹ A na paká me bhú ká yi-e, okpála koko adɛ nani namene osisiti 'ngú bhomɛ. Engú bini, mbia inde-e, Ebhe avɛɛ yi bhú siti 'ngú gba yi-e avɛɛ. Ani a'o yi kpi pi e, ani atsia amene me yi kolo ngbingbili kala ni. Ani amene ndɛ 'ngú bhomɛ-o hana li kpadji gba Ngámá gba ní Yesu Kilisito di ne bhe gba Bu Bhobua gba e-o.

Kɛte ní ne eti gba Bu Bhobua

¹² Mɛ ti da napa me: «Ma nde lie ne makilisito-o, ma ti da namene ndɛ 'ngú hana.» A na paká moko, mɛ ti da namemene. Engú bini, ongú koko bhú ká ongú inde mɛ ngamene e bhomɛ-o ti da nateteke mɛ de. Ma aziba me, ma ti da namene

ndu 'ngú hana. Engú bini ngama-a, ma kunda nadu bali na 'ngú bini de. ¹³ Mu ti da napa matá me: «Ebhe aha ezu ngubula nabledhe ebu ne di. Ani atsia amene di ebu ngubula ezu.» A na paká moko. Engú bini, li sokpí-e, Ebhe abhéle ebu, ani tsia bhéle di ezu. Ndandu bhisi hana tsia ndjulu. Padhá de, anga Ebhe bho kute ní ngubula nadhuku ne olisi, i du di-e ne obhosi ngangá de. Ani amene mangbo kute ní ngubula nakpata Ngámá Yesu ne di. Padhá de, anga a ko Ngámá na kute ní ngae. ¹⁴ Ebhe azuku Ngámá gba ní Yesu Kilisito bhú kuo. Ani azúku bhadi kute ní bhú angu gba e-o.

¹⁵ Yi mbila de me, kute yi ne saka yá Kilisito di? Lele pi ma ahá kute ma inde saka yá Kilisito lie ngú nakpøtse ne kute øle na zabhe-e? Bhobhomu-o méne lie belegu de bini! ¹⁶ Yi mbila de me, i du me kpála nde akpøtse lie ne øle na zabhe-e, ndu uo bhisi hana akolo koli kute bini-e di? Padhá de, anga u aye bhú Bhuku gba Ebhe-e me: «Ndu uo bhisi hana akólo koli kpála bini.^d» ¹⁷ La-a, kpála bhende akpøtse lie ne Ngámá-a, akolo ne ani ne koli bua bini. ¹⁸ Ka 'ngú angu-o, yi 'o nadhuku ne olisi, i du di-e ne obhosi ngangá ma'o. Ondu 'ngú na sisiti li kpála amemene e hana-a, ani memene ne kute e de. Engú bini, kpála inde ngakpøtse lie ne øle na zabhe-e ngamene siti 'ngú ne kute e makpe. ¹⁹ Yi mbila de me kute yi ne eti gba Bu Bhobua-a di? Yi mbila la di de me Bu Bhobua angu-o ngadu bhú yi, Ebhe aha la di pi yi ngae di? Kute yi ne ehe ka yi ade. A ko na Ebhe. ²⁰ Ebhe akala yi bhú kpéke mase. Kaka-a, kute yi dhøgø Ebhe bhú ndu 'ngú hana inde yi ngamene e ne di-o.

7

Polo agie 'ngú pi omabhuka na gudhu na Kolito pindji 'ngú na kava

¹ Mbia inde-e, ma ngagie 'ngú pi yi li ongu maka yi ayi ma lie bhú balua gba yi-o. Ngayi-e, yi ngapa me: «A ndjindji pi bhoko me ani abú 'kpa e li øle de.»

^d6:16 Nakolo koli kpála bini inde si-e, a kpi ne nakolo koli kute bini. Tsia bhú Dje. 2:24.

² Abana mo-o, ma ngabhundja me, kabula nadu nadhuku ne olisi, i du di-e obhosi ngangá de-e maka okoko bhú ká yi ngamemene lie, a ndjindji me bhoko ha elo gba e, amba elo ha di bhoko gba e. ³ A ayo me bhoko mene pi elo gba e ehe inde li bhoko amemene e pi elo maka a ayo lie-o. A ayo la di me elo mene pi 'ko e engu inde li elo amemene e pi bhoko gba e ko.

⁴ Elo ti da namene ne kute e maka ani akunda lie de. Kute ani ne ehe ka 'ko ani. La di-e, bhoko ti da namene ne kute e maka ani akunda lie de. Kute ani ne ehe ka wala ani. ⁵ Kpála bini agbite kute e pi kilí e de. Yi mene bha bini mo-o me yi nde adje liyi bhú dabili bini, ngu na'o mbo nedhinga ngubula nayo Ebhe. Pipita-a, amba yi gie liyi bhú dabili bini, anga yi mene mo-o de-e, yi ti bhú gumu kute, yi tsia ti bhú ekú gba Satana . ⁶ Engu nagbite kute o ngubula nedhinga bedi ma ngapa e pi yi inde-e, a ko líli de, a ko mangbo ngu napa pi yi me, i du me yi nde amene mo-o, a adú sisiti de.

⁷ Ma akunda naali me ndu okpála hana du olingbangi maka ma. La-a, a ti da namene lie mo-o de, anga Ebhe aha makalá pi ní kpi kpi kpi. Ani aha pi okoko naha lio. Ani atsia aha pi okoko nadu olingbangi.

⁸ Engu ma ngapa e pi olingbangi ne ookesi-e ngae inde: a ndjindji pi yi nadu kpi yi kpi maka ma. ⁹ Engu bini, yi u me yi ti da nadu kpi yi kpi de-e, yi de ha liyi. A ndjindji me yi ha liyi nane me gumu kute ha angu yi.

A ayo me omabhuka inde bhú kava-a agbó busu o de

¹⁰ Pi okpála bhende bhú kava-a, ma ngapa bhobhomu-o ngama Polo ade, a ko Ngámá Yesu Kilisito . Ani apa me, a ayo de me elo yie bhú kava-a de. ¹¹ I du me elo nde ayie bhú kava-a, ani ahá matá bhoko koko de. I du me ani nde au me ni ti da nadu kpi ni kpi de-e, ani de gie lie bhú kava gba e-o. Pi bhoko-o, a ayo de me ani gie wala e de.

¹² Pi okpála koko-o, ma ngapa 'ngu inde-e ngama, a ko Ngámá Yesu de. Ma ngapa me: i du me a nde ka makilisito na bhobhoko ne elo inde mapagano-o, i du me elo ango-o nde akunda nadu ne 'ko e-e, 'ko ani de du ne ani. ¹³ A bhadi moko pi elo inde makilisito. I du me 'ko ani nde ne makilisito ade-e, li bhoko ango-o

kànda nadu ne wala e-e, u de du ne ani. Olo-o atse ani de. ¹⁴ Padhá de, anga bhoko inde ne makilisito ade bhomu-o ti da nabhuka ka wala e inde ne makilisito-o. A bhadi moko pi ole inde ne makilisito ade-o. I du me 'ko ani nde ne makilisito-o, ani ti da nabhuka ka 'ko e inde makilisito-o. Padhá de, anga i du mo-o de-e, li ongisi gba uo-o du maka ongisi gba okpála inde i bhuka de. Engú bini, u ti da nabhuka ka 'dyi o, i du di-e ka 'hi o inde abhuka-o.

¹⁵ La-a, kpála bhende ne makilisito ade-e kànda nagbo bhusu o ne makilisito-o, u de gbo bhusu o. A moko, kpála inde ne makilisito, i du bhoko, i du di-e ole-o sa líli bini ngu nadu bha bhú kava bhomu ade. La-a, yi mbila me Ebhe a'i ní me ní du bhú kava bhú guo 'ngu . ¹⁶ Mu ti da nambila lele pi, ngamu ole inde ne makilisito me ni ti da nakobho 'ko ni de-e? I du di-e ngamu bhoko inde makilisito-o, mu ti da nambila lele pi me ni ti da nakobho wala ni de-e?

A ayo me kpála ne kpála du kala Ebhe lele maka ani adu nani lie-o

¹⁷ Engú na ngbéngbé inde bhú 'ngu bhomu-o, a ko me kpála ne kpála du maka li Ngámá Ebhe aha pi ani lie-o. A ayo la di me ani du maka ani adu nani lie nedhinga li Ebhe a'i ani lie-o. A bhomu-o líli inde ma aha e bhú ndu oDadjua gba Ebhe-e hana-o. ¹⁸ I du me Ebhe nde a'i kpála me ani nde ali gandja ali-e, a ayo de me ani wo gandja inde ani ali e bhomu-o de. I du la me Ebhe nde a'i kpála me ani nde li nga ngandja de-e, a ayo de me ani li gandja-a de. ¹⁹ Padhá de, anga li kpála li gandja-a, ani li di gandja de-e ne 'ngbé 'ngu ade. Engú na ngbéngbé-e, a ko namene líli gba Ebhe.

²⁰ A ayo me kpála ne kpála du lele maka ani adu nani lie li nedhinga li Ebhe a'i ani lie-o. ²¹ Mu du nani ne bali nedhinga li Ebhe a'i mu lie? Mo odje tsulu de. Engú bini, i du me a nde pi mu nedhinga me mu koto bhú bali-e, mu de koto.

²² Kpála bhende adu nani bali li nedhinga li Ngámá a'i ani lie akoto mbia inde bhú bali-e akoto, anga ani akpetse lie ne Ngámá. La-a, kpála bhende ne bali bhú 'ngu na doto ade-e, inde li Ebhe a'i e-e, ani akolo mbia inde-e bali gba Kilisito. ²³ Ebhe akala yi ne mase naali. Kaka-a, a ayo de me yi kolo obalise gba okpála na doto de.

²⁴ Ondaise ma, a ayo me kpála ne kpála du kala Ebhe lele maka ani adu nani lie li

nedhinga li Ebhe a'ni ani lie-o.

Engú pindji olingbangi

²⁵ Pi okpála bhende i ha nga olisi de-e, ma ngaha pi yi-e mabhundja gba ma maka kpála inde u ti da naziba e ka bádha bhú 'bu gba Ebhe-o . Ebhe kata ma ngae de. ²⁶ Ka likabhu inde na nedhinga inde-e, ma abhundja me a ndjindji pi kpála me ani dɔ bha maka ani nde lie-o. ²⁷ Mɔ ngakunda naha ɔlɔ? Mo oyála ani de. Mɔ kunda naha ɔlɔ di? Dɔ lingbangi. Mo ohá ɔlɔ de. ²⁸ Engú bini, i dɔ me mɔ nde aha ɔlɔ-o, mɔ mene bhomɔ-o siti 'ngú de. I dɔ la di me tsa ɔlɔ nde aha bhoko-o, ani mene siti 'ngú de. La-a, yi mbila ndjindji me okpála bhende ngaha olisi ngazɔ likabhu p'la doto naali. Ma akunda la de me yi zɔ likabhu bhomɔ-o de.

²⁹ Ondaise ma, ma akunda napa pi yi me, nedhinga inde atigala pi ní-e bedi. Nayie pi mbia inde ngú nanɔ ne kalanɔ-o, a ayo me okpála bhende ka o ne olisi dɔ mɔgito me olisi ka uo ade. ³⁰ Okpála bhende ngaku 'gbá-a mene mɔgito me uo bhú likabhu ade. Obhende ngamɔ 'zo-o mene mɔgito me uo bhú djali ade. Obhende ngakala 'he mene mɔgito me ehe ka uo ade. ³¹ Obhende ngasia tia na doto inde-e mene mɔgito me tia ka o ade. Padhá de, anga doto maka i ngau lie lie mbia inde-e, bhúe matá nedhinga bhelé de.

³² Ma akunda me yi adú ne likabhu de. Bhoko bhende i ha ɔlɔ de-e gbite lie li engú gba Ebhe, ani ngagili nanga li Ebhe. ³³ Engú bini, bhoko bhende aha ɔlɔ-o, agbite lie li ongú na doto, ani ngagili namene engú inde anga li wala e. ³⁴ Ani agbo la di bhɔsɔ e li di kulu bhisi. A bhadi moko pi ɔlɔ inde aha bhoko, ani ngagbite lie li 'ngú na doto. Ani ngagili namene engú inde nganga li 'ko e. Engú bini, pi ɔlɔ, i dɔ di-e tsa ɔlɔ bhende i ha nga bhoko de-e, ani ngagbite lie li engú gba Ngámá. Padhá de, anga ani akunda naha lie pi ani bhú ndɔ 'ngú hana inde ani ngamene e, ne bhende ani ngabhundja e-o.

³⁵ Ma ngapa 'ngú bhomɔ-o ngɔbula bádha 'ngú gba yi, ma pa ngɔbula na'o tili kili li 'ngbɔ yi de. Engú bini, a ko ngɔbula me yi mene engú inde ndjindji, amba yi kpata la di Ngámá Yesu ne bua yi hana.

³⁶ La mbia inde-e, i dɛ me makombi bini nde akpe namene siti 'ngú li pabíli gba tsa ɛlɛ inde ani abedhe ne gɔmɔ naha e, ani bhundja me a ayo me engú angó-o kpata kpadji na ndjindji-e, ani de mene maka ani au lie. Ani mene siti 'ngú de. U de ha lío maka lí bhoko-o akɔnda lie-o. ³⁷ Engú bini, i dɛ me makombi-e nde apa me ní ha tsa ɛlɛ bhomɔ-o de-e, i dɛ me engú angó-o nde ayie lí bua ani makpe me u nde kata ani tété gandji de-e, ani amene bhadi bádha 'ngú. ³⁸ Bhoko bhende aha tsa ɛlɛ inde nako ani adɛ nakɔnda naha e amene bádha 'ngú. Engú bini, bhoko bhende apa naae me ní ha ani de-e, amene bádha 'ngú naali.

Engú pindji oekesi

³⁹ Ɔlɛ inde lí 'ko e nde bhú ka-a tí da nadɛ ne bhoko koko de. Engú bini, i dɛ me bhoko angó-o nde akpi-e, bhobhomɔ-o aha kpadji pí ani ngú naha bhoko koko maka ani akɔnda lie. La-a, a ayo me bhoko angó-o dɛ ne makilisito. ⁴⁰ Engú bini, ngama-a, ma abhundja me i dɛ me ani nde adɛ kpi e kpi-e, ani dɛ bhú djali nane me ani ha matá bhoko koko. Ma pa mo-o, ma abhundja me Bhobua gba Ebhe-e di bhú ma.

8

Kpadji na imbilangɔ di ne kpadji na mukɔnda

¹ Mbia inde-e, ní tsia nga 'ngú pindji so 'nɛ inde u aha e pí oebhe na eu. A na paká me imbilangɔ bhú ndɛ ní hana, maka yi ngapapa lie-o. 'E-e! Imbilangɔ angó-o tí da naha pí kpála 'ngbé 'ndji. Engú bini, mukɔnda naae ngadyudyo ní bhú nabhuka ne kalanɔ. ² Kpála bhende ngabhundja me ní ambíla 'ngú-o mbíla nga maka a ayo lie me ani mbíla-a de. ³ Engú bini, kpála kɔnda Ebhe na paká paká-a, Ebhe ambíla kpála angó-o.

Yi ató ondaise yi bhú ngita de

⁴ Pindji 'ngú inde atsia so 'nɛ inde u aha e pí oebhe na eu-o, ní tí da nazɔzɔ, ne me ní tí da nazɔzɔ de? Ní mbíla ndjindji me oebhe na eu ne oehe na kukulɔ ade. Ní ambíla di me, Ebhe bha koli e bini kpi e kpi. ⁵ A na paká me a abhúlá di ne

píla doto ne oehe inde li okpála ngadhögö o maka oebhe gba o. Ongua oebhe na eu bhom̄-o bhelé, u di ngako pí okpála. ⁶ La pí ní-e, ní mbíla ndjindji me koli Ebhe bha bini. A ko 'Dyi ní inde abho nd̄ 'he hana píla doto. Aní atsia abho di ní me ní d̄ pí ní. Ní la bhadi ne koli Ngámá bini, a ko Yesu Kilisito . Nd̄ 'he hana ngayie ka aní, ní di ngasia m̄kobho ka aní.

⁷ Engú bini, i d̄ me ní nde ambíla me m̄kobho bhú oebhe na eu ade-e, a ne okpála inde imbíla nga k̄k̄l̄ 'ngú ang-o má k̄l̄k̄t̄ de. Okpála koko bhú ká yi ad̄ nadhögö oebhe na eu. La mbíla inde-e, uo bha ngaz̄ so 'n̄ ang-o ne nabhundja me oebhe na eu bhom̄-o ne angu pépé. Okpála ang-o nga bha bh̄bh̄k̄ li kpadji gba Ebhe. Abhom̄-o, u ngabhundja me so 'n̄ ang-o ngato o bhú siti 'ngú kala aní. ⁸ Ní mbíla ndjindji me ez̄ bini tí da nadyudyo ní de Ebhe masikpe de. Beleḡ ní z̄, beleḡ ní z̄ de-e, a méne 'ngú bini li ní de.

⁹ 'E-e! Yi lila liyi me, kpadji inde u aha e pí yi ngú naz̄ nd̄ 'he hana-a, a tó okpála bhende bh̄bh̄k̄ bhú nabhuka bhú siti 'ngú de. ¹⁰ Padhá de, anga i d̄ me kpála inde bh̄bh̄k̄ bhú nabhuka nde au m̄, ngam̄ kpála inde ambíla k̄k̄l̄ 'ngú ambíla-a, m̄ nde ngaz̄ so 'n̄ inde u abh̄l̄ e pí oebhe na eu bhú eti u adhdhögö uo bhú e, mo ombhundja naam̄ me aní tí da di naz̄z̄ di?

¹¹ Kaka-a, kpála inde bh̄bh̄k̄ ang-o, ndai m̄ inde li Kilisito akpi pí e tsia ngíta ka m̄, kabula engú nasisiti inde mo omene e, ngam̄ kpála ambíla k̄k̄l̄ 'ngú má k̄l̄k̄t̄-o ambíla-o! ¹² Namene ngua siti 'ngú bhom̄-o li pabíli gba ondaise yi-e, di ne na'o eka li bua uo inde nakpokpo kú 'ngú inde bh̄bh̄k̄ bhom̄-o, a ko namene siti 'ngú li Kilisito ngae makpe. ¹³ Kaka-a, i d̄ me ez̄ bini nde ngato ndai ma bhú siti 'ngú-o, ma z̄ matá ez̄ ang-o de, amba ndai ma atí bhú siti 'ngú ka ma de.

9

Lele li Polo ad̄ nakpokpo Bádha Ngali gba Yesu Kilisito lie-o

¹ Ngama-a, ma tí da nasia nd̄ 'he hana maka s̄ka obh̄l̄ titima gba Ngámá gba ní Yesu Kilisito di? Ngama-a, ma u aní ne djila ma makpe di? Ngayi-e, yi bhuka

ani ka kulu gba ani inde ma amene e bhú ka yi-e di? ² Belegu li okpála koko ziba de me ma ne saka obhulu titima gba Yesu-o di-e, la pi yi-e, ma ne bhulu titima gba ani. Padhá de, anga nau me yi akpotsé liyi ne Ngámá-a asuno na paká me, ma ne bhulu titima gba ani, anga ma akpokpo Bádha Ngali-e pi yi ngama.

³ Eli inde ma agie e pi okpála inde ngapa 'ngú li ma sisiti-e ngae inde: ⁴ A ayo di de me ya sia ezú di ne ehe nandji mandji kabula kulu inde ya ngamene e di? ⁵ Yi abhundja naayi me li ya ha elé inde makilisito me ya dá nadhuku bhú dabili bini ne ani maka Piele ne obhulu titima koko gba Yesu, di ne ondaise Yesu-o, amba ko siti 'ngú? ⁶ Yi abhundja naayi me, okpála inde a ayo me u mene kulu ne 'kpa o ngú nakobho ka o-o bha ne ya ne Balabasi? ⁷ Kpála inde bhú kulu na sudha-a haha makalá gba e pi e ngae makpe uu? Belegu de bini. Li kpála lu edyi-e, ani zuzu ezú ang-o di, i dá me kpála nde ngalila enu-o, ani ndjindji miliki na 'ka 'nu ang-o di?

⁸ Ongú inde ma apa e bhomu-o, a ko bha bini bhende li okpála ngabhundja e ngao-o de. U aye bhadi bhú líli gba Moidje-e moko. ⁹ Padhá de, anga u aye bhú líli ang-o me: «I dá me bagala nde ngatú ngano-o, mo ogbíte 'bhé ani de. 'O me ani zu mbo té ngano ang-o uu.†» Yi abhundja naayi me Ebhe apa 'ngú bhomu-o bha bini pi obagala? A mo-o ade. ¹⁰ Ebhe apa 'ngú bhomu-o pi ní makpe adi? A na paká me ani apa pi ní. Padhá de, anga kpála inde ngalu 'dyi-e nga'o 'to e li ezú inde ani asía e-o. A bhadi ndjindji me kpála bhende nga'e nguwa abhiye-e sia té nguwa ang-o.

¹¹ Ya akpokpo Bádha Ngali pi yi maka u alulu nguwa lie abhiye-o. I dá la me yi nde ateteke ya ne tia na doto-o, amba a ko siti 'ngú? ¹² I dá me okpála koko nde ngasia tia na doto ka yi-e, ka ni ngaya-a, ya ti da nasisia ka yi lie de-e? Engú bini, ya tsia yo ehe ka yi de. Ya ngakibila ndu likabhu hana inde ngakolo li kate ya-a, anga ya kanda namene engú inde i ní kpadji pi okpála me u adjé Bádha Ngali gba Yesu Kilisito-o de-e de.

¹³ Yi mbila de me okpála inde ngamene kulu bhú 'ngbé 'ti Ebhe-e ngasia ezú

†9:9 Tsia bhú Det. 25:4, di ne bhú 1 Tim. 5:18.

gba o bhú kulu inde u ngamene e adi? Obhende ngatsulu enu pi Ebhe-e ngasia tété ngú nazuzú adi? ¹⁴ A bhadi moko pi okpála bhende ngakpokpo Bádha Ngali-o. Ngámá gba ní-e apa me, okpála inde ngakpokpo Bádha Ngali-e, akóbho bhadi li Bádha Ngali.†

¹⁵ Engú bini, belegu inde lie mo-o, ngama-a, ma yo ehe bini ka yi de. Ma pa pi yi de me, ma aye balua inde-e pi yi me yi tima 'he muma-a de. A ndjindji muma naali me ma kpi ne gumu! A ayo de me kpála bhelo engú inde ma nde ne gindaginda ka e de. ¹⁶ Nakpokpo Bádha Ngali ma ngakpokpo e-e ha kpadji muma de me 'ndji ma be-e de. Padhá de, anga Ebhe ngae makpe apa muma me ma kpokpo Bádha Ngali ang-o. A moko, a ko likabhu muma i du me ma nde kpokpo Bádha Ngali-e de ko. ¹⁷ I dú nani me ma alo kulu ang-o ngama-a, a de adú ndjindji me u ha makalá muma tété. A la mo-o ade. Ma lo kulu ang-o ngama makpe de. Ma ngamemene anga Ebhe a'o kulu ang-o sakpa ma. ¹⁸ Makalá ma ngasia e li kulu ang-o ne ni? Makalá gba ma ne nakpokpo Bádha Ngali-e mandí nayo 'he. Maka kpála nakpokpo Bádha Ngali-e, ma ti da nayo 'he ka yi, la-a ma yó ehe bini de.

Polo ateteke kpála ne kpála bhú dasundu gba e ngú nabhuka Ngámá Yesu

¹⁹ Ma bhú ngu ma, ma ne bali gba kpála bini ade. La-a, ma atsia a'o lima bali gba nu okpála hana, ngubula me ma sia okpála bhelé ngú nabhuka Ngámá Yesu.

²⁰ Li ma du bhú ká omaYuda-a, ma dú maka uo ngubula me ma teteke uo ngú nabhuka Ngámá Yesu. Ma ambila ndjindji me líli gba Moidje ne angu pí ma ade. Engú bini, i du me ma nde bhú ká okpála inde ngamene líli ang-o, ma améne mugito me ma sa líli ang-o ngubula me ma teteke uo ngú nabhuka Ngámá Yesu.

²¹ Li ma du bhú ká okpála bhende i mbila líli gba Moidje de-e, ma adú bhadi maka uo ngubula me ma teteke uo ngú nabhuka di Ngámá Yesu. Bhobhomu-o kanda napa de me ma mene líli gba Ebhe de-e de. Ma ngamemene anga ma ngamene líli gba Ngámá Yesu Kilisito. ²² Li ma du bhú ka okpála inde bhubhuku li kpadji gba Ebhe-e, li ma 'ó di lima bhubhuku ngú nateteke uo ngubula me u

†9:14 Tsia bhú Luk. 10:7, di ne bhú Mat. 10:10.

kolo kpekpeke bhú nabhuka Ngámá Yesu. Belegu li okpála du lele pi-ie, i du me ma nde akolo bhú ká uo-o, ma dú bhadi maka uo ngubula me ma teteke okpála koko bhú ká uo ngú nabhuka Ngámá Yesu, amba u kobho. ²³ Ma ngamene ndu 'ngú bhomu-o hana ngubula me Bádha Ngali-e nu ne kalanu, amba Ebhe tuko bisagu pí ma bhú kulu ango-o.

A ayo natsia 'kpí lio ndjindji bhú nabhuka

²⁴ Yi mbila de me, okpála inde agugu holo-o, u dudu okpála bhelé, engú bini kpála bhende akokoto kalanu-o sisia makalá ngae. Yi mene ne kpéke maka okpála inde ngagu holo, amba yi sia di makalá. ²⁵ Ndu okpála hana inde agugu holo-o dudu sa líli nakpekpeke. U ngamene mo-o ngubula nasia makalá. La-a, makalá ango-o bhúe de. Engú bini nganí-e, ní ngamene ngubula nasia makalá inde adu dudu ma ne dudu ma. ²⁶ Kaka-a ngama-a, ma ngagu holo ngangá ade. Ma la di maka kpála inde ngagu gbele me ani nde ngatsia 'kpí lie ndjindji. ²⁷ Ma ngamene kate ma kpekpeke ngú napa me kate ma mene líli gba ma-o, amba li sokpí-e, Ebhe abhíke ma de, pita nakpokpo Bádha Ngali pi okpála koko-o.

10

Yi lila liyi ka nale-e malila

¹ Ondaise ma, ma ngagbele 'dje yi mo-o, ngubula me yi bhundja nga matá engú inde akolo nani li onguo ogbi ní bhú nedhinga u adu adhuku lie nganda Moidje-o. [†] Ebhe abuku nani ndu uo hana ne ndindi ngú nalila uo. Ndu uo hana agulu nani 'ngbé 'ngu na Mbembe. ² Nabuku uo ne ndindi ne nakodho 'kpí ka uo bhú 'ngu-o amana mugito me Ebhe aha pi uo bhomu-o Batisimo, ngubula me u kpetse lio bini ne Moidje. ³ Ndu uo hana azu ezu inde adu ayie ka Ebhe. [†] ⁴ Ndu uo hana andji engu inde adu akoto bhú teme. Teme ango-o, a ko kulu Yesu Kilisito inde adu adhuku ne uo bhú dabili bini-o. ⁵ La-a, belegu u au ongamba 'ngú

[†]10:1 Tsia bhú Eki. 13:21-22, 14:19-29.

[†]10:3 Tsia bhú Eki. 16:35.

bhomu-o lie hana-a, okpála bhelé bhú ká uo du amene engú inde anga li Ebhe-e de. Kaka-a, u amu, u atsia atigala bhú 'gu.†

⁶ Ongú bhomu-o ngasuno pi ní me, ní adú ne gumu namene siti 'ngú maka onguo ogbi ní de.† ⁷ Yi ayó oebhe na eu maka okoko bhú ká uo amene nani lie de. Padhá de, anga u aye bhú Bhuku gba Ebhe-e me: «Okpála adulu kuto ngubula nazu anokomia. Pipita-a, u atsia ayie bhúlá ngú nadho 'bi kala kulu ebhe na eu.†»

⁸ Okpála koko bhú ká uo adu adhuku ne olisi ngangá. Kaka-a, okpála ketø ndjikpa bhisi ne ká bata atsia amu bhú koli 'kpí bini. Pi ní-e, ní améne maka uo de.†

⁹ Okpála koko bhú ká uo ale Ngámá. Kaka-a, okpalu adolo uo má bi bi bi, uo atsia amu. Pi ní-e, ní améne maka uo de.† ¹⁰ Okpála koko bhú ká uo adu adi mutokono li Ebhe. Kaka-a, andjelu gba Ebhe inde abhøbhøle kpála-a, a atsia ago abhili uo. Pi yi-e, yi adí mutokono li Ebhe maka uo de.†

¹¹ Ndu ongú bhomu-o hana akolo li uo ngubula nateteke okpála koko me u améne maka uo de. U aye ongú angu-o bhú Bhuku gba Ebhe ngubula me asuno kpadji pi ní, nganí inde ngakobho li sokpí-o. ¹² Kaka-a, kpála bhende ngabhundja me ni alu bhú nabhuka kpekpeke-e lila lie ndjindji me ni atí-i de. ¹³ Nale inde ngabhaka yi-e, a ko nale inde ngakolo bha li ndu okpála hana. Ebhe atéteke yi maka ani apa lie-o. Ani ti da naka kpadji de me engú inde akólo li yi-e ha angu yi-e de. Engú bini, i du me nale nde akolo li yi-e, Ebhe há angu pi yi ngú nakikibila. Ani tsia téteke yi me yi atí-i de.

Yi lila liyi ka oebhe na eu-o malila

¹⁴ Kaka-a, ondaise ma na mukunda, yi 'o nadhøge oebhe na eu ma'lo. ¹⁵ Ma ngagama 'ngú pi yi maka okpála na imbilangu. Yi aló doto bhú 'ngú ma ngapa e

†10:5 Tsia bhú Nom. 14:16, 29-30.

†10:6 Tsia bhú Nom. 11:4, 34.

†10:7 Tsia bhú Eki. 32:6.

†10:8 Tsia bhú Nom. 25:1-18.

†10:9 Tsia bhú Nom. 21:5-6.

†10:10 Tsia bhú Nom. 17:6-14.

ngayi makpe. ¹⁶ Nedhinga ní adúlú lie pí misa gba Ngámá-a bhú dabili bini-e, ní ngandji vino inde ní ngagie heni pí Ebhe ngú e-o. Ní akpètse liní bhomú-o ne Yesu Kilisito bhú ngúte e. Li ní gumú mapa-a ngú nazú-o, ní akpètse bhomú-o liní bhú kúte Yesu Kilisito. ¹⁷ Koli mapa-a bha bini. Belegú ní nde lie bhelé-e, ndú ní hana ní ngazú koli mapa bini bhomú. Bhobhomú-o ngasuno me ní akpètse liní, ní akolo bini.

¹⁸ Yi bhundja nga okpála na Isalaele. Nedhinga u ngazú enú inde u aha e pí Ebhe lie, u akpètse lío bhomú bhú dabili bini ne Ebhe inde u aha enú bhomú-o pí e-o. A mo-o adi? ¹⁹ Ma akúnda napa bhomú-o pí? Ma akúnda napa me, ebhe na eu di ne enú inde u ha e pí ani-e, a ne tata? ²⁰ A mo-o ade. Ma apa mangbo me, lí okpála bhende ímbila Ebhe de-e dú naha 'he bhú 'tí oebhe gba o-o, u haha pí odjabúlú. U haha pí Ebhe de. La-a, ma kúnda de me yi kpètse líyi ne odjabúlú-o de. ²¹ Yi tí da nandji vino bhú kópo gba Ngámá Yesu, yi tsia ndjí di bhú bhende gba odjabúlú-o de. Yi tí da nazú 'he pí misa gba Ngámá, yi tsia zú di pí misa gba odjabúlú-o de. ²² Yi abhundja me ní kpekpeke ane Ngámá-a? Ní akúnda me bua ani ke ne ní?

Yi mene ndú 'ngú hana ngúbula nadhegò Ebhe

²³ Okpála koko bhú ká yi ngapa me: «Ya ne omakilisito, ya tí da namene ndú 'ngú hana.» A na paká, engú bini, ongú koko tí da nateteke ní de. Yi ngapa me: «Ní tí da namene ndú 'ngú hana.» La-a, ongú koko tí da namene de me okpála koko bhele lí kpadji gba Ebhe-e de. ²⁴ A ayo de me kpála 'o bha 'to e 'to e makpe de, engú bini, a ayo me ani 'o di 'to e 'to okpála koko.

²⁵ Yi tí da nazú ndú enú hana inde u ngatsíndji e bhú daposò me yi nde yi 'ngú tété de kabula bua nakpokpo ku 'ngú gba yi-o. ²⁶ Padhá de, anga Bhuku gba Ebhe-e apa me: «Doto ne ndú 'he inde bhúbhú-o hana ne tíka ka Ngámá.†»

²⁷ I dú me mupagano nde a'í mú agba e ngú nazú 'he-e, i dú me mú nde akúnda nanú-o, lí mú kolo-o, mú de zú ndú 'he hana u ahá e pí mú-o, mo oyí 'ngú bini de kabula bua nakpokpo ku 'ngú gba mú-o. ²⁸ La-a, i dú me kpála nde apa pí mú me

†10:26 Tsia bhú Ets. 24:1.

enɛ inde mɛ ngazɛ e bhomɛ-o, a ko enɛ inde u aha e pi oebhe na eu-o, mo ozɛ-ɛ de, amba bua nakpokpo kú 'ngú gba kpála inde apa 'ngú ango-o pi mɛ-o asíti de.

²⁹ Ma ngapa 'ngú bhomɛ-o pɛndji 'ngú inde li kpála bhomɛ-o ti da nabhundja e li bua nakpokpo kú 'ngú gba e-o. Ma pa ngɛbula bua nakpokpo kú 'ngú gba mɛ-o de. Ka ni ma améne 'ngú lie li lele mabhundja gba kpála koko, ma nde mene mangbo maka ma ngabhundja lie ngama makpe-e di-e? ³⁰ I dɛ me ma nde agie heni pi Ebhe ngɛbula ezɛ-o, ka ni li kpála koko nga uu lie sisiti-e?

³¹ Abhomɛ-o, i dɛ me yi nde ngazɛ 'he, i dɛ di-e me yi nde ngandji 'he nandji mandji, i dɛ di-e me yi nde ngamene mangua 'ngú koko dho i-e, yi de mene ndɛ 'ngú bhomɛ-o hana ngú nadhogɛ 'li Ebhe. ³² Yi améne engú inde li okpála koko ti da natɛ ka e de, abana omaYuda, abana obhende ne omaYuda ade, abana okpála na Piga gba Ebhe. ³³ Ngama-a, ma bhadi ngamene mo-o. Ndɛ 'ngú ma ngamene e hana, ma ngamemene me a nga li ndɛ okpála hana. Ma bha ngabhundja engú inde atéteke ma-a ade. Ma ngabhundja mangbo pɛndji engú inde i ti da nateteke okpála bhelé, amba Ebhe kobho uo.

11

¹ Yi kpata engú inde ma ngamene e maka ma ngakpata bhende gba Kilisito lie-o.

Lele nadɛ ka obhosi di ne olisi bhú nedhinga nayo Ebhe

² Ma ngaha apepe pi yi, anga yi ngabhundja ma bhú ndɛ 'ngú hana. Yi la di ngamene olíli gba omabhuka inde ma asuno e pi yi-o. ³ La-a, ma akɛnda me yi mbila engú inde: Kilisito ne Ngámá pí 'ndji bhoko. Bhoko ne ngámá pí 'ndji ɛlɛ. Ebhe ne Ngámá pí 'ndji Yesu Kilisito. ⁴ I dɛ me bhú nedhinga nayo Ebhe, li bhoko dɛ nayo Ebhe, ani dɛ di-e nakpokpo eli inde ani asia e ka Ebhe me ani nde adyi ndata-a, amba ani ngaha bhomɛ-o nɛmɛ pi Ngámá gba e-o. ⁵ Engú bini, i dɛ me bhú nedhinga na mayo-o, li ɛlɛ 'o 'ndji e padhá li nedhinga ani ngayo Ebhe lie, i dɛ di-e li nedhinga ani ngakpokpo eli inde ani asia e ka Ebhe-e lie-e, ɛlɛ ango-o ngaha nɛmɛ pi ngámá gba e-o. Ani maka ɛlɛ inde aka 'ndji e maka. ⁶ I dɛ

me ɔlɔ nde ga kitambala bhú 'ndji e de-e, amana mɔgito bhomɔ-o me ani aka 'ndji e maka. I nde la lie me a nde nɔmɔ pi ɔlɔ ngú naka 'ndji e ndundundu, i dɔ di-e ma ngbidhidhi-e, a ayo me ani ga kitambala bhú 'ndji e.

⁷ La pi bhoko nedhinga ani ngayo Ebhe lie-e, a ayo de me ani dyi ndata-a de, anga Ebhe abho ani li kulu e. Ani ngasuno sangu gba Ebhe. La pi ɔlɔ-o, ani ngasuno sangu gba bhoko. ⁸ Yi mbila ndjindji me, Ebhe bho gina bhoko li ɔlɔ de, engú bini ani abho mangbo gina ɔlɔ li bhoko. ⁹ La di-e, Ebhe bho bhoko pi ɔlɔ de, ani abho mangbo ɔlɔ pi bhoko. ¹⁰ Kaka-a, i nde lie me Ebhe abho ɔlɔ mo-o, a ayo me ani ga kitambala bhú 'ndji e ngú nasuno me ani ti da nayo Ebhe, amba oandjelu mbila me ndɔ 'ngú hana li lelele.

¹¹ Ní mbila ndjindji me kala Ngámá-a, olisi ne gɔmɔ obhosi, obhosi la di ne gɔmɔ olisi. ¹² Padhá de, anga maka u abho nani ɔlɔ lie li bhoko-o, a bhadi moko a ngazu bhoko ne ɔlɔ, la di-e, ndɔ 'he hana ngayie ka Ebhe.

¹³ Yi pa nga ngayi, a pi ɔlɔ ndjindji nayo Ebhe me ani nde buku 'ndji e di? ¹⁴ Ndɔ okpála na píla doto hana mbila ndjindji me a ko nɔmɔ pi bhoko ngú na'lo sundjo e ndjandjandja. ¹⁵ La pi ɔlɔ-o, ndjandja sundjo-o, a ko bádha 'ngú naali. Padhá de, anga Ebhe aha nani sundjo pi ɔlɔ ngú nabuku 'ndji e ne di. ¹⁶ I dɔ me kpála nde akɔnda nabi bhayiki li 'ngú bhomɔ-o, a ayo me ani mbila me lele dasɔndɔ gba ní-e ngae bhomɔ. Piga gba Ebhe-e alɔ la bhadi pí 'ngú bini bhomɔ.

Polo agbele 'dje omabhuka li lele nazɔ komonyo

(Tsia bhú Mat. 26:26-29, ne bhú Mik. 14:22-25, di ne bhú Luk. 22:15-20.)

¹⁷ Ní kodho 'kpí li 'ngú koko. Ma ti da nadhɔgɔ yi tété de. Padhá de, anga nedhinga yi ngakpɔtɔ liyi lie ngú nayo Ebhe-e, engú yi ngamene e ngagie mangbo yi ne sidi. A dyudyo yi ne kalanɔ de. ¹⁸ Na bini-e, u apa mɔma me nedhinga yi ngakɔ liyi lie bhú dabilí bini-e, yi ngagbogbo bhɔsɔ yi. Ma abhundja me a ti la bhadi nadɔ moko. ¹⁹ A ayo la bhadi me nagbo bhɔsɔ o dɔ bhú ká yi, amba okpála mbila obhende ngakpata Yesu Kilisito ne bua o bini-o. A mo-o adi! ²⁰ Nedhinga yi ngakpɔtɔ liyi lie ngú nazɔ ezɔ gba Ngámá-a, yi ngabhundja ani bhúbhú ade. ²¹ Okpála koko bha bini ngagbene lio ngú nazɔ 'he gba o makpe.

Ka 'ngú angó-o, okoko ngalangba, okoko la ngadulá gúmá. ²² Gbágbá lí yí ade ngú nazú 'he dí ne ngú nandjì pandì tété-e? Ne me yí ngau Dadjua gba Ebhe-e padhá. Yí atsia akúnda naha nómá pí okpála inde lí ehe nde ka o ade. Yí nga'ò 'to yí me ma pá pí yí pí? Ma adhégo yí lele pí me yí ngamene bádha 'ngú-o? A mo-o ade. Ma adhégo yí tété de.

Lele nazú komonyo

²³ Ongú inde ma asuno e pí yí ngama makpe-e, ma asia ka Ngámá Yesu. Engú angó-o me: sukpe inde u adjì apú aní lie pí obhulá yala-a, Ngámá Yesu aha mapa, ²⁴ aní agíe heni pí Ebhe, aní agúgúmá, aní atsia apa me: «A inde-e kúte ma inde ma aha e pí yí-o. Yí dá amene me-e, ngú nakina ma.» ²⁵ Píta u andjia nazú 'he-e lie, aní aha bhadí kópo na vino moko. Aní atsia apa me: «Vino inde-e, ngasuno gandja na mbia inde lí Ebhe akodho e ne yí-o. Gandja angó-o alá pí ngúte ma. Ndá nedhinga hana inde yí adú andjindjì lie, yí dá andjindjì ngú nakina ma.» ²⁶ Lí bìlì bhómá-o, Ngámá Yesu akúnda napa me: ndá nedhinga hana inde yí azú mapa lie dí ne nedhinga inde yí andjì vino lie mo-o, yí bhómá-o ngakpokpo pí okpála mbámbá nakpì ka aní akoló lí 'kpí inde aní agíe lie lie-o.

²⁷ Kaka-a, kpála inde azú mapa gba Ngámá Yesu, inde andjì lá dí vino gba aní-e lí lelele de-e, asía mangimbo anga aní andjò kúte Ngámá Yesu, aní atsia andjò dí ngúte aní. ²⁸ A ayo me kpála ne kpála tsia lie makpe ngae bhúbhulá, amba pípíta-a, aní tsia zú mapa, amba aní ndjì dí vino gba aní-o. ²⁹ Padhá de, anga lí kpála zú mapa gba Ngámá Yesu, aní tsia ndjì dí vino gba aní-e me aní nde ngauu maka í de ehe na padhá-a, aní bhómá-o ngagbele mangimbo pí e ngae makpe. ³⁰ A bhómá-o, engú inde yí ngau ka e me okpála bhelé bhú ká yí ne kuo, okoko bhúbhúkú, lá dí-e, okoko bhelé amu. ³¹ Í dú me ní dú atsia bua ní nganí makpe kala nazúzú-o, Ngámá de kódho 'ngú gba ní-e de. ³² Engú bini, Ngámá ngakodho 'ngú gba ní-o, aní dí ngalílì ní ngúbula me aní a'ó galikpe engú pí 'ndjì ní bhú dàbílì bini ne pí 'ndjì okpála koko de.

³³ Ka 'ngú angó-o, ondaise ma, nedhinga yí ngakpòtsò líyì lie ngú nazú ezú gba Ngámá-a, yí dje líyì sùnda yí. ³⁴ Í dá me sùka yí nde ne gúmá-o, a ayo me aní zú

ngaiza 'he agba e, ngubula me yi agbéle mangimbo gba Ebhe-e pí yi de bhú nakpètse lie gba yi-o. Píndjì onǵú koko inde yi ayi e-e, ma agíe 'ngú pí yi pépé nedhinga ma akólo lie agba yi-o.

12

Angu inde li Bu Bhobua ngaha e pí kpála ne kpála ngú nateteke Piga gba Ebhe-o

¹ Ondaise ma, píndjì engú bhende atsia angu li Bu Bhobua ngaha e pí kpála ne kpála ngú nateteke Piga gba Ebhe-e, ma akúnda me yi mbíla 'ngú tété. ² Yi mbíla ndjìndjì me nedhinga yi adú nga lie ne omupagano-o, osisiti bua adú agbele yi li pápá gba oebhe na eu inde i gama 'ngú de-o. U atsia amba bhúla yi li okpadjì ngangá. ³ Kaka-a, ma apa pí yi mbámá lele nambíla me kpála ngagama 'ngú bhú angu gba Bu Bhobua. Kpála dú nagama 'ngú bhú angu gba Bu Bhobua-a, aní tí da napa de me a ayo me u tú pèdjè li Yesu-o de. Engú bini, li kpála pa me: «Yesu ne Ngámá-a», a akúnda napa me Bu Bhobua akata aní ngae.

⁴ Angu li Bu Bhobua ngaha e pí kpála ne kpála ngú nateteke Piga gba Ebhe-e kpi kpi kpi, la-a, ngaani Bu Bhobua inde ngaha angu ang-o, koli aní bha bini má kpíkíli! ⁵ Ní tí da namene kulu pí Ngámá Yesu li okpadjì ngangá, la-a, ngaani Ngámá Yesu inde ní ngamene kulu ang-o pí e-e, koli aní bha bini má kpíkíli! ⁶ Ebhe ngaha angu pí okpála kpíkíkpi ngú namene kulu gba aní-e ne di. La-a, Ebhe bhúla naha angu bhómú-o pí okpála-a, koli aní bha bini má kpíkíli!

⁷ Angu gba Bu Bhobua-a ngasuno lie bhú kpála ne kpála ngubula me aní teteke okpála koko ne angu ang-o. ⁸ Bu Bhobua ngaha pí okpála koko-o angu nagama 'ngú ne imbilangú. Pí okpála koko-o, Bu Bhobua bini bhómú-o ngaha angu nasuno 'ngú gba Ebhe-e pí okpála. ⁹ Bu Bhobua bini bhómú-o ngaha pí okpála koko angu nadú ne nabhuka na kpekpeke. Koli Bu Bhobua bini bhómú-o ngaha pí okpála koko angu nadú nakobho okuo li okpála. ¹⁰ Bu Bhobua ngaha pí okpála koko angu namene ongamba 'ngú . Pí okoko-o, aní ngaha angu nakpokpo engú maka opolofeta . Pí okoko-o, aní ngaha angu nambíla nagbogbo bhúsú osisiti bua ne Bu Bhobua. Pí okoko-o, aní ngaha angu nagama 'ngú bhú eli gba

oandjelu. Pí okoko-o, aní ngaha angu nambamba tata. ¹¹ Ndu 'ngú bhomu-o hana ngayie ka koli Bu Bhobua bini. Aní ngaha pí kpála bini ne bini angu maka aní akunda lie.

Piga gba Ebhe-e maka kute kpála inde ne oyáyá lie bhelé

¹² Kute Yesu Kilisito maka kute kpála-kuti inde lí oyáyá nde lie bhelé. Mú tsia 'lá kpála-kuti-e, yáyá lí aní bhelé, kute aní la bha koli e bini má kpíkili! Abana lí yá kpála nde lie bhelé-e, ndundu hana amene bha koli kute bini. ¹³ Ndu ní hana, abana omaYuda ne okpála inde ne omaYuda ade, abana okpála inde bhú bali ne obhende bhú ngu o, ndu ní hana ní asia nani batisimo ngu napa me ní kolo maka kute bini lí kpadji gba Bu Bhobua bini. Ndu ní hana, ní atsia asia bhadi angu gba Bu Bhobua bhomu-o.

¹⁴ Mú tsia kute kpála-kuti-e, oyáyá tété bhelé, a bha koli e bini ade. ¹⁵ Lí 'dhu kpála pa me: «Ma ne yá kpála ade anga ma nde ne kpele kpála ade-e», a ko de me aní ayíe yá kpála kaka-a de. ¹⁶ Lí 'dje kpála pa me: «Ma ne yá kpála ade, anga ma ne djila kpála ade-e», a ko de me aní ayíe yá kpála kaka-a de. ¹⁷ Í du me 'lá kpála-kuti libhomu du bha ne djila-a, kpála de adú naje 'kpí lele pí? Í du di me 'lá kpála-kuti libhomu nde bha ne edje-e, kpála de adú naje se 'he lele pí? ¹⁸ A na paká me Ebhe a'o nani oyá kpála-kuti maka aní akunda lie. ¹⁹ Í dú me Ebhe 'ó nani lí kpála bha koli yáyá bini-e, u de 'í de me a ko kpála-kuti-e de. ²⁰ Engú bini, a mo-o ade. Oyáyá lí kute koli kpála bini-e bhelé.

²¹ Kaka-a, djila tí da napa pí ekpa de me: «Ma ne gumu mú ade-e de.» La di-e, endji tí da napa pí odhu de me: «Ma ne gumu yi ade-e de.» ²² Engú bini, oyá kpála bhende ní ngau e me abhubhuku-o, pí ní ne tata. ²³ Obhe ní ngau e me tata tété naali ade-e, ní ngalilila nane okoko mane. Obhe ní ngadje numu lí napa 'ngú o-o, ní ngatsia 'kpí tété ndjindji. ²⁴ Oyá ní bhe lí numu nde lí ní lie ade-e, ní nga'o 'to ní tété naali ade. Engú bini, Ebhe abho 'lá kpála-kuti da napa me ní du atsia 'kpí lí oyá ní bhe nga'o numu lí ní-e ndjindji. ²⁵ Aní amene mo-o ngubula me nagbo bhusu o adú bhú kute ní de, engú bini, oyá ní hana du nateteke lío sunda o. ²⁶ Í du me yá kpála bini nde ngazu líkabhu-o, ndu okoko hana ngazu líkabhu bhú

dabili bini ne ani. I dɛ me u nde ngadhøge yá kpála-kɛti bini-e, ndɛ okoko hana ngakpi ndjili ne ani bhú dabili bini.

²⁷ Pí yi-e, yi ndɛ yi hana ne kɛte Kilisito, akɛnda napa me, yi ne oyá ani. Kpála ne kpála ne da e bhú kɛte Yesu Kilisito. ²⁸ Kaka-a, bhú Piga gba Ebhe-e, Ebhe a'o ngaiza na bini obhɛɛ titima gba Yesu , na bhisi-e, ani a'o okpála bhende ngakpokpo 'ngú maka opolofeta, na bata ani a'o omɛsuno. Pipita-a, ani a'o okpála inde ngamene ongamba 'ngú. Pipita-a, ani a'o okpála bhende ngakobho obhɛɛ kuo. Ebhe atsia aha di angu pí okpála koko ngú natsia 'kpí lí obí o di ne nateteke uo. Ani a'o okpála inde ngasuno kpadji pí okpála koko. Ani atsia aha di angu pí okpála ngú nagama 'ngú bhú oeli gba oandjelu.

²⁹ Ndɛ okpála hana ne obhɛɛ titima gba Yesu? Ndɛ okpála hana ne okpála nakpokpo 'ngú maka opolofeta? Ndɛ okpála hana ne omɛsuno? Ndɛ okpála hana ne angu namene ngamba 'ngú? ³⁰ Ndɛ okpála hana di ne angu ngú nakobho okpála na kuo? Ndɛ okpála hana di ne angu ngú nagama 'ngú bhú oeli gba oandjelu? Ndɛ okpála hana di ne angu ngú nambamba ta 'ngú? ³¹ Kaka-a, a ayo me yi bedhe ne gɛmɛ namene ongú inde lie ne tata ngú nateteke okpála koko.

Mbia inde-e, ma adji asuno pí yi kpadji inde ane okoko ne bádha ngɛbula me yi teteke Piga gba Ebhe-e tete.

13

Polo akpo 'ngú pindji makunda bhú Piga gba Ebhe

¹ Abana i dɛ me ma nde ne angu nadi ndɛ eli gba okpála hana, i dɛ di-e bhe gba oandjelu , i dɛ me makunda nde bhú ma ade-e, ma bha bini maka mangbou inde lí gili e ngau, i dɛ di-e mbɛɛ ngbøngbé inde lí gili e ngau kpekpeke. ² I dɛ me ma nde ne angu nakpokpo 'ngú maka polofeta , i dɛ me ma nde ne imbilangɛ na ndɛ ongú hana, i dɛ me ma nde ne angu nakø mboli ndɛ ongú lí Ebhe awo e mawo, i dɛ me ma nde di ne nabhuka inde i tí da napa me ma 'e ne di eta, i dɛ la me makunda nde bhú ma ade-e, ma ne ehe na padhá. ³ I dɛ me ma nde apɛ ndɛ 'he gba ma-a hana pí obhɛɛ ndibhili, i dɛ me ma nde atse belegu kɛte ma

me u tsulu bhú djua, i dɛ la me mɔkɔnda nde bhú ma ade-e, bhobhomɔ-o ne tata pi ma ade.

⁴ Kpála inde ne mɔkɔnda pi obi e-e, bua ani ndjándjá, ani di ngamene babadha 'ngú pi obi e. Ani ne 'ngbé bua li 'he gba okpála koko ade, a ko pa 'li e de, ani di ne 'ngbé 'ndji ade. ⁵ Kpála inde ne mɔkɔnda pi obi e méne engú na nɔmɔ de. Ani bhúndja bha bini engú gba e kpi e kpi de. Ani ké di 'ngú lie de. Ani gbíte di bua e pi obi e de. ⁶ Kpála inde ne mɔkɔnda pi obi e kpí djali li siti 'ngú de. Ani ngakpi mangbo djali li bádha 'ngú. ⁷ Kpála inde ne mɔkɔnda pi obi e ngakibila ndɔ 'ngú hana li okpála amene e li ani-o. Ani ngabhuka ndɔ 'ngú hana, ani nga'o 'to e ndɔ nedhinga hana 'to Ebhe, ani di ngagbite bua e ka ndɔ 'ngú hana magbite.

⁸ Mɔkɔnda ndjía 'kpí bini de. La-a, nedhinga akolo makolo li ongú inde li okpála ngakpokpo e maka opolofeta andjía mandjia. Nagama 'ngú bhú oeli gba oandjelu-o andjía mandjia. Angu nasuno 'ngú gba Ebhe-e pi okpála-a andjía mandjia. ⁹ Padhá de, anga angu nasuno 'ngú gba Ebhe-e pi okpála píla doto akódho 'kpí makodho. La di-e, angu gba ní nakpokpo 'ngú maka opolofeta akódho 'kpí makodho. ¹⁰ Engú bini, ekpí li Ebhe ambámba ta ongú na babadha pi ní lie, li ongú bhende libhomu ade-e tsia ndjía.

¹¹ Nani ma adɔ lie bhú ndili-e, ma adɔ agama 'ngú maka ndili, ma adɔ abhundja maka ndili, ma adɔ di akɔ mboli 'ngú maka ndili. Engú bini, nedhinga ma abhele lie, ma a'o namene engú bhe na ndili-o. ¹² A la bhadi pi ní moko. Bhú mbia inde-e, ní ngau ohe bulusu bulusu mɔgito me ní ngatsia 'kpí bhú bitolobi bhende na didili. Engú bini, ekpí akólo makolo ní aú ndɔ 'he hana má ngilili ne djila ní! Bhú mbia inde-e, imbilangɔ gba ma-a mbila ndɔ 'ngú hana de. Engú bini, ekpí akólo makolo ma tsia mbíla ndɔ 'ngú hana má ngilili maka Ebhe ambíla ma lie ngae makpe-o!

¹³ Ngú nabu tata-a, ní mbíla me ongú bata inde-e yíe bhú da o de. Ongú ango-o ngae inde: nabhuka Ebhe, na'o 'to o 'to ani, a la di-e nadɔ ne mɔkɔnda pi ani di ne pi obi o. La-a, bhú káká hana-a, nadɔ ne mɔkɔnda pi Ebhe di ne pi obi o, ane ndɔ obhe bhisi bhomɔ-o hana.

Nakpokpo 'ngú maka polofeta ane nakpokpo 'ngú bhú oeli gba oandjelu

¹ Yi mene ne kpéke me yi d̩ ne m̩k̩nda pi obi yi. Yi d̩ ne g̩m̩ angu li Bu Bhobua ngaha e pi kpála ne kpála ngú nateteke Piga gba Ebhe-o, ane la mane angu nakpokpo 'ngú maka polofeta . ² Kpála inde ngakpokpo 'ngú bhú oeli gba oandjelu ngakpokpokpo pi Ebhe. Ani kpo pi okpála de, anga kpála bini k̩ mboli engú ani ngakpokpo e de. Ani ngakpokpo bhú angu gba Bu Bhobua ta ongú inde li Ebhe awo ta e mawo-o.

³ Engú bini, kpála inde ngakpokpo 'ngú maka polofeta-a, ngakpokpokpo pi okpála ng̩bula nabe nd̩ nabhuka gba uo-o, ngú nato masi bhú uo di ne ngú nateteke bua uo. ⁴ Kpála inde ngagama 'ngú bhú eli gba oandjelu-o ngabe nd̩ nabhuka gba e kpi e kpi. Engú bini, kpála inde ngakpokpo 'ngú maka polofeta bhú oeli li nd̩ okpála hana ngadje e-e, ngabe nd̩ nabhuka gba okpála na Piga gba Ebhe-e libhomu. ⁵ Ma ne g̩m̩ me nd̩ yi hana yi d̩ nagama 'ngú bhú oeli u mbila e de. La-a, a nga matá li ma naali me yi d̩ nakpokpo ongú maka opolofeta. Padhá de, anga kpála d̩ nakpokpo 'ngú bhú oeli gba oandjelu-o, a ayo me kpála koko d̩ ngú nambamba tata. I d̩ mo-o de-e, kpála bhende ngakpokpo 'ngú maka polofeta ngabe nd̩ nabhuka gba okpála na Piga gba Ebhe-e libhomu ane mane.

⁶ Ondaise ma, ma yi nga yi: i d̩ me ma nde ago agba yi, ma nde ngagama 'ngú pi yi bhú oeli gba oandjelu-o, tata pi yi tété ne ni? Tata bini ade. A ayo mangbo me ma go kpokpo 'ngú pi yi bhú eli inde yi ambila e, beleg̩ i d̩ engú li Ebhe ambamba ta e m̩ma, i d̩ di-e me ma go ha pi yi imbilang̩ na mbia, i d̩ di-e me ma go kpokpo 'ngú pi yi maka polofeta, ne me ma go suno 'ngú pi yi, a ayo me yi mbila tata-a ndjindji.

⁷ Yi bhundja nga pindji omav̩ mbálá. U d̩ na'u mbálá-a, u 'u li lelele de-e, mo ombíla salisali-e lele pi? A bhadi moko pi d̩m̩. ⁸ La di-e, i d̩ me bh̩ na'u mbala nde 'u li lelele de-e, okpála aléke lio ngú egú lele pi? ⁹ A bhadi pi yi moko. Okpála aké mboli engú yi ngapa e bhú eli na gandji gandji-e lele pi, i d̩ me u

nde mbila eli bhom̄-o de-e? A mana me yi ngagama 'ngú pi anvi. ¹⁰ Oeli p̄la doto kpikpikpi. Engú bini, nd̄nd̄ hana abhú 'ngú. ¹¹ La-a, li kpála d̄ nagama 'ngú bhú eli inde ma mbila e de-e, kpála bhom̄ m̄ma ne gandji kpála , ma di pi ani ne gandji kpála. ¹² A bhadi pi yi moko. Maka yi ak̄nda lie ne bua yi hana nasia angu gba Bu Bhobua-a, yi ḡli naali nad̄ okpála inde ngabe nd̄ nabhuka gba okpála na Piga gba Ebhe-o.

¹³ Kaka-a, kpála bhende ngagama 'ngú bhú eli gba oandjelu-o, a ayo me ani yo ka Ebhe angu nambamba ta eli ango-o. ¹⁴ Padhá de, anga i d̄ me ma nde ngayo Ebhe bhú ngua eli bhom̄-o, bua ma bhú mayo na paká paká, engú bini, im̄bilanḡ gba ma-a li kulu bini ade. ¹⁵ I d̄ mo-o, a ayo me ma mene pi? A ayo me ma yo Ebhe bhú eli gba oandjelu, engú bini, ma ayó di ani ne im̄bilanḡ gba ma-o. A ayo me ma li 'tsi bhú eli gba oandjelu-o, engú bini, ma alí di ne im̄bilanḡ gba ma-o. ¹⁶ Padhá de, anga i d̄ me m̄ nde ngagie heni pi Ebhe bha bhú oeli gba oandjelu-o, kpála bhe yi nde ne e bhú 'ti Ebhe-e apá me: «A ad̄ moko» li mayo gba m̄ nagie heni-e lele pi me, ani nde mbila engú m̄ ngapa e de-e? ¹⁷ A bana i d̄ me mayo gba m̄ nagie heni-e nde bha babadha naali-e, i d̄ bhú oeli gba oandjelu-o, a be nd̄ nabhuka gba kilí m̄ yi nde ne e bhú 'ti Ebhe-e de.

¹⁸ Ma ngagie heni pi Ebhe anga ma ngagama 'ngú bhú oeli gba oandjelu-o ane nd̄ yi hana. ¹⁹ Engú bini, i d̄ me ya nde apo bhúla ya ne omaha Ebhe-e, ma uu nd̄jind̄ji me ma pa engú bhuluvue inde li okpála adjé e ne tata nḡbula nasuno 'ngú pi uo, ane me ma pa engú k̄t̄ nd̄jikpa bhú oeli gba oandjelu.

P̄nd̄ji nakpokpo 'ngú bhú eli gba oandjelu-o, yi d̄ nabhundja maka obhelesi okpála

²⁰ Ondaise ma, p̄nd̄ji ongú ma apa e pi yi bhom̄-o, yi ad̄ abhundja p̄p̄é maka ongisi de. Yi d̄ ne odjedje ongisi li p̄p̄á na siti 'ngú. Engú bini, yi d̄ ne obhelesi okpála li p̄p̄á na nabhundja 'ngú. ²¹ U aye bhú Bhuku gba Ebhe-e me, Ebhe Ngámá apa me:

«Li kpad̄ji gba ogand̄ji okpála ne bhú 'li uo-o, ma agáma 'ngú pi omaha ma.

Abana mo-o, u djé ma de.†»

²² Kaka-a, nagama 'ngú bhú oeli na gandji gandji-e, a ko ehe inde ngasuno mangimbo gba Ebhe-e pi okpála inde i bhuka de-o. La-a, pi okpála bhende abhuka-a, a pi uo ade. Nakpokpo 'ngú maka polofeta-a, a pi omabhuka . La-a, pi obhende i bhuka de-e, a pi uo ade.

²³ I dɔ me yi nde apo bhúla yi ngú nayo Ebhe-e, li ndɔ yi hana holo nagama 'ngú bhú oeli gba oandjelu-o, i dɔ me okpála bhende i mbila 'ngú bhomɔ-o de-e, i dɔ di-e obhende i bhuka de-e go oo, u pá de me yi ne obhɔlɔ pele-e di? ²⁴ La-a, i dɔ me yi nde ngakpokpo 'ngú maka opolofeta-a, li okpála bhe imbila engú bhomɔ-o de, i dɔ di-e okpála bhe i bhuka de-e go li bhú ká yi-e, u tsia ké mboli siti 'ngú gba o-o. Engú inde u ngadje e hólo bua uo. ²⁵ Ongú inde awo lie li bua uo-o zé li zi 'kpí. Abhomɔ-o, u tú 'ndji o ne kuto. U tsia dhégo Ebhe ne napa me: «Ebhe bhú ká yi na paká!»

Yi dɔ amene 'ngú bhú Piga gba Ebhe-e li lelele

²⁶ Ondaise ma, ní abú tata-a lele pi? Nedhinga yi apo bhúla yi lie ngú nadhého Ebhe-e, kpála bini bhú ká yi ti da nali etsi, koko ti da nasuno eli gba Ebhe pi okpála, koko ti da nakpokpo engú li Ebhe ambamba ta e pi ani, koko ti da nagama 'ngú bhú oeli gba oandjelu, li koko tsia mbámba tata. A ayo me yi mene ndɔ 'ngú bhomɔ-o hana da napa me abe ndɔ nabhuka gba okpála gba Ebhe-o.

²⁷ I dɔ me okpála holo nagama 'ngú bhú ká yi bhú oeli gba oandjelu-o, a ayo me a de dɔ okpála bhisi, i dɔ bhisi de-e, a de pise bhú bata. A ayo la di me u dɔ agagama bini bini, kpála bini nde ngambamba ta 'ngú u ngagama e-o. ²⁸ Li kpála nambamba ta 'ngú bhomɔ-o dɔ de-e, a ayo me kpála inde i di me gama 'ngú bhomɔ-o ndjili bhú ká yi má bulu! Ani nɔ gama bha bini pi Ebhe agba e. ²⁹ Pi okpála bhe ngakpokpo 'ngú maka opolofeta-a, a ayo me okpála bhisi, i dɔ di-e bata gama 'ngú, amba okpála koko lo doto bhú 'ngú u ngakpokpo e-o. ³⁰ La-a, i dɔ me Ebhe nde asuno engú koko na mbia pi sɔka yi inde bhú ká yi oo, a ayo me kpála bhende ngagama 'ngú-o 'o nga nagagama, ngɔbula me kilí ani-e gama 'ngú.

†14:21 Tsia bhú Isa. 28:11-12.

³¹ Kaka-a, yi dɛ nagama 'ngú maka opolofeta, a ayo me yi gama bini bini. Yi mene mo-o ngɔbula me ndɛ omaha Ebhe hana sia imbilangɔ, amba yi to di masi bhú ndɛ uo hana. ³² Okpála inde ngakpokpo 'ngú maka opolofeta-a, a di bhú uo ne angu ngú nagbite 'bhø o pí engú li Ebhe asuno e pí uo-o. ³³ Padhá de, anga Ebhe kɔnda de me ní dɛ amene 'ngú pɔpɔlɔ-o de. Engú bini, ani akɔnda mangbo me ní dɛ amene 'ngú li kúkú. Maka u amemene lie bhú ndɛ oDadjua gba Ebhe-e hana, ³⁴ nedhinga yi apøkøbhø bhúla yi lie ngú nayo Ebhe-e, a ayo me olisi^e ndjili má bulu! U ha kpadji pí uo ngú nagama 'ngú oo de. A ayo me u ndjili ma bulu ngú nadjø 'ngú u ngakpokpo e-o, maka li líli gba Moidje apa lie-o. ³⁵ I dɛ me u nde akɔnda nambila 'ngú pindji ongú bini bini-e, u de yi obhosi gba o-o akuti. A ndjindji ade me ølø gama 'ngú bhú makpøtsø gba omabhuka.

³⁶ Aiya! Ne me yi ngabhundja me eli gba Ebhe-e ayie agba yi, ne me eli ango-o, a ko bha bini na yi 'he kpi yi kpi? ³⁷ Li kpála bhundja me ni ne polofeta-a, ne me ani bhundja me ni asia angu gba Bu Bhobua-a ngú nabe ndɛ nabhuka gba okpála gba Ebhe-e, a ayo me ani mbila me engú inde ma aye e pí yi inde-e, a ko líli ayie ka Ngámá. ³⁸ Engú bini, ani bhuka mo-o de-e, Ngámá mbila di ani de.

³⁹ Kaka-a, ondaise ma, yi gili ne bua bini nadɛ nakpokpo 'ngú maka opolofeta. La-a, yi ayóko okpála de me u agáma 'ngú bhú oeli gba oandjelu-o de-e de. ⁴⁰ A ayo mangbo me ndɛ 'ngú bhomɔ-o dhøkɔ li lelele, yi améne bhú tolo de.

15

Nabhuka gba ní-e alɔ pí nazuku gba Yesu Kilisito

¹ Ondaise ma, ma akɔnda matá nakpokpo pí yi Bádha Ngali inde yi asia e, inde yi adhedhe di lie má kpakala-o! ² Bádha Ngali ango-o ngakobho yi, i dɛ me yi nde ngalilila maka nako ma akpokpo pí yi lie-o. I dɛ mo-o de-e, tata li nabhuka gba

^e14:34 Abana li olisi nde lie ne angu ngú nayo Ebhe-e, di ne nagama 'ngú maka opolofeta-a bhú ká omabhuka-a, u ha nani kpadji pí uo ngú nalo doto bhú ongú li opolofeta adɛ apa e de. Tsia bhú 1 Kol. 1:11, 5.

yi-e ade.

³ Ma asuno pi yi ongu na ngbengbengbe inde ma asia e ka Yesu Kilisito-o . Engu angoo me: Yesu Kilisito akpi pindji mugwe gba ni-o, maka u aye lie bhu Bhuku† gba Ebhe-o. ⁴ U azi ani, ani atsia azuku bhu 'kpi na bata maka li Bhuku gba Ebhe-e apa lie-o.† ⁵ Ani azuku lie, ani akoto li Piele. Pipita-a, ani akoto li obhulu titima ndjikpa ne ka bhisu gba e-o.

⁶ Pipita-a, ani akoto li omakpata gba e nane kama bhuluvue mane bhu nedhinga bini. Bhele na uo nga bha bhuka, okoko amu. ⁷ Pipita-a, ani akoto li Djaki, ani atsia akoto di li ndu obhulu titima gba e hana.

⁸ Pita ndu uo hana-a, ani akoto di li ma, belegu ma du lie ne tetele kpala de-o. ⁹ Ma ne bhulu titima na yeye ane mane bhu ka obhulu titima-o. A na paka me, ma ti belegu da napa de me kpala 'i ma me bhulu titima gba Yesu-o de. Padha de, anga ma ato nani mbolo li Piga gba Ebhe-o. ¹⁰ Engu bini, bhu badha bhu 'bu gba Ebhe-e , ma maka ma nde lie inde. Badha bhu 'bu gba ani nani ani aha e ma bhomu-o padha ade. La-a, ma amene kulu kaka naali nane obhulu titima koko hana. Angu angoo yie ka ma de, badha bhu 'bu gba Ebhe-e adu mangbo namene kulu bhu ma ngae. ¹¹ Kaka-a, abana ma, abana obhulu titima koko-o, a bhomu-o Badha Ngali inde ya ngakpokpo e-o, a la bhadi bhomu-o Badha Ngali inde yi abhuka e-o.

A na paka me okpala azuku di mazuku

¹² Badha Ngali ya ngakpokpo e me Yesu Kilisito azuku. I du la me a nde mo-o, lele pi li okpala koko bhu ka yi ti da napa lie me okpala inde amu-o zuku de-e?

¹³ I du na paka me okpala inde amu-o nde zuku de-e, bhobhomu-o akunda napa di me Yesu Kilisito zuku de. ¹⁴ I du la me Yesu Kilisito nde zuku de-e, akunda napa me tata bini li Badha Ngali ya ngakpokpo e ade, tata bini la di li nabhuka gba yi-e ade.

¹⁵ I du me Yesu Kilisito nde zuku de-e, amba akunda napa me ni ngapa eu li

†15:3 Tsia bhu Isa. 53:5-12.

†15:4 Tsia bhu Oz. 6:2, di ne bhu Luk. 24:34-49.

Ebhe. Padhá de, anga ní ngapa pi okpála me Ebhe azuku Yesu Kilisito bhú ka okpála inde amu-o. La-a, ani mene mo-o de, i d̩ me okpála nde zúku di de-o.

¹⁶ Padhá de, anga i d̩ me okpála nde zúku de-e, bhobhom̩-o ak̩nda napa di me Yesu Kilisito zuku de. ¹⁷ I d̩ me Yesu Kilisito nde zuku de-e, bhobhom̩-o ak̩nda napa me tata bini li nabhuka gba yi-e ade, yi nga bha sa mangimbo gba Ebhe.† ¹⁸ A ak̩nda di napa me okpála bhende amu me u nde abhuka Kilisito-o, amu d̩d̩ma ne d̩d̩ma. ¹⁹ I d̩ me nganí omabhuka ní nde a'o 'to ní 'to Kilisito bha bini ng̩bula m̩kobho inde-e, amba ní ne okpála na likabhu naali nane okpála koko.

²⁰ La-a, a mo-o ade, a bha ndj̩ na paká me Kilisito azuku bhú ka okpála inde amu-o! A ko kpála na gigina inde azuku bhú kuo. ²¹ Padhá de, anga koli kpála bini amene nani me kuo li p̩la doto, koli kpála bini koko atsia amene la bhadi me okpála amu-o zuku. ²² Nd̩ okpála hana ngamu, anga ní ne opiga gba Adam̩ . Nd̩ okpála hana inde abhuka Yesu Kilisito asía bhadi m̩kobho ka ani. ²³ Engú bini, kpála ne kpála azúku li nedhinga gba e. Kilisito azuku nani kalan̩. Li nedhinga ani agó lie, li okpála gba ani-e tsia zúku di.

²⁴⁻²⁵ Abhom̩-o, Yesu Kilisito méne me nd̩ osisiti angu hana kolo padhá. Ani tsia kó angu e pi nd̩ okpála na angu hana inde ngag̩ ani-o. Padhá de, anga a ayo me ani ̩ ngámá akólo bha makolo li Ebhe a'ó nd̩ obhul̩ yala gba ani-e lie hana sa 'dh̩ ani-o. Pipita-a, li 'ngú na doto ndj̩a. Ani tsia gíe na̩-o pi Ebhe 'Dyi e.† ²⁶ Bhul̩ yala na soso inde li Ebhe abhél̩ e-e, a ko kuo. ²⁷ Padhá de, anga u aye bhú Bhuku gba Ebhe-e me: «Ebhe a'o nd̩ 'he hana má kp̩k̩bhe sa 'dh̩ ani!†» Engú bini, i d̩ me u nde apa mo-o, a mbám̩bá me u to Ebhe bhúbhú de. Ani sa Nd̩li gba e ade. ²⁸ Li nd̩ 'he hana a akólo lie sa angu gba Kilisito-o, li ngaani makpe Nd̩li-e, ani tsia 'ó lie makpe sa angu gba Ebhe, ng̩bula me Ebhe ̩ ngámá pí 'ndj̩ nd̩ 'he hana má da!

†15:17 Tsia bhú Lom. 6:8-11.

†15:24-25 Tsia bhú Ets. 110:1.

†15:27 Tsia bhú Ets. 8:7.

Pindji 'ngú nazuku ka okpála inde amu-o, yi apíte liyi de

²⁹ Okpála koko bhú ká yi ngasia batisimo mada okpála inde amu-o. Uo ngasia ní? I dɛ me okpála inde amu-o nde zúku de-e, uo la ngasia batisimo mada uo ka ní?

³⁰ I dɛ me okpála nde zúku de-e, ka ní ya ngazɛ líkabhu lie ndɛ nedhinga hana-a?

³¹ Ondaise ma, a na paká me ndɛ 'kpi hana kuo de ma masikpe. A la bhadi paká me ma ne gindaginda kabula yi akpɛtsɛ liyi lie ne Ngámá gba ní Yesu Kilisito-o.

³² A bhú gɔdɛ na Efeso-o, ma azɛ líkabhu naali sakpa okpála. A mana mɔgito me ma adɛ agɛ gbele ne onɛ 'te. I dɛ me ma nde ngabhundja bha bini ndɛ ongú na doto-o, gbele ango-o atéteke ma lele pi? I dɛ me okpála inde amu-o nde zúku de-e, bhobhomɛ asuno me engú inde u apapa e me: «Ní zɛ 'he, amba ní ndji di vino, anga ní amú mambi-e!†» A ko kɛkɛlɛ 'ngú.

³³ Yi apíte liyi de. Yi mbila me, mɛ kɛ dhɛkɛ ne kpála na siti 'ngú-o, mɛ tágba di siti 'ngú. ³⁴ Yi gie liyi li ngbili kpadji, amba yi améne matá siti 'ngú de. Okpála koko bhú ka yi mbila Ebhe de. Ma ngapa mo-o, ngɛbula me yi sia nɛmɛ.

Bhú nazuku ka okpála-a, kute ní adjí lie na mbia

³⁵ Kpála bini ti da nanyi ma me: «Okpála inde amu-o, azúku lele pi? Kute u azúku ne e adú lele pi?» ³⁶ Ma gíe pi ani me, ngamɛ-o, mɛ ne ngingi. Ngua inde mo olu e ti da nakɛ-ɛ de, i dɛ me a nde zi de ko. ³⁷ Ngua inde mo olu e, i dɛ di-e dadha, i dɛ di-e ngua koko-o, mɛ ngalu bha bini líli. Mɛ lu lálá bhende akɛ-o de. ³⁸ Píta li ngua akɛ lie, li Ebhe há pipi lálá na mbia maka ani akɛnda lie. Ani ngaha pi ngua ne ngua 'lá e makpe.

³⁹ Kute ndɛ 'he hana inde bhú mɛkobho-o bhadi kpi kpi kpi. Kute kpála-kɛti kpi ne bhende gba onɛ, bhende gba odhu di ne bhende gba osungu. ⁴⁰ A ne oehe inde na abhúlá, a la di ne oehe na kuto ei. Bádha gba oehe na abhúlá-a kpi ne bhende gba oehe na kuto ei. ⁴¹ A li ela ne zi e, a li epe ne zi e, a la di li oikɛpala ne zi o. Belegɛ bhú ká oikɛpala-a, zi uo kpi kpi kpi.

⁴² A adú bhadi moko li okpála amu-o azúku lie-o. Kute inde u azi e azí mazi.

†15:32 Tsia bhú Isa. 22:13.

Kute inde azuku-o zí matá-a de. ⁴³ U azi maka ehe li tata nde lie naali ade, li angu nde bhú e ade. Li azúku lie-e, a abédhe ne angu, i tsia dú di babadha. ⁴⁴ Nedhinga nazizi-e, a ko kute na doto. Li azúku lie, a adú kute inde li Bu Bhobua ngaha mukobho pi e ngae. A ne kute na doto, a la di ne kute inde li Bu Bhobua ngaha mukobho pi e. ⁴⁵ A maka u aye lie bhú Bhuku gba Ebhe-e me: «Adamu nani ne kpála-kuti na kalanu, ani asia mukobho ka Ebhe.†» La-a, Kilisito u a'i e me Adamu na bhisi-e abedhe ne Bu Bhobua, ngaani-e, ani ngaha mukobho pi okpála. ⁴⁶ Ehe na kalanu inde u ngau e-e, a ko kute na doto. Pipita-a, u tsia ú la kute inde li Bu Bhobua ngaha mukobho pi e-o. ⁴⁷ Adamu, kpála na kalanu li Ebhe abho e nani ne kpála-kuti, Ebhe abho ani li doto. Kilisito, Adamu na bhisi-e ayie naae abhúla. ⁴⁸ Kute okpála-kuti maka kute kpála li Ebhe abho nani e li doto-o. La-a, kute okpála inde azúku ngú nanu abhúla-a, adú bhadi maka kute kpála inde ayie abhúla. ⁴⁹ Mbia inde-e, ní maka kpála inde li Ebhe abho e li doto. Kpí bini, ní adú bhadi maka kpála bhende ayie abhúla-o.

Ngámá Yesu Kilisito aha angu kuo

⁵⁰ Ondaise ma, ma apa pi yi me kpála-kuti lí bhú Nau gba Ebhe-e ne kute na doto inde-e de. Kute inde nazi mazi-e ti da nadu duduma ne duduma de.

⁵¹ Yi gbo nga dje yi, ma adji nambamba pi yi inde ta 'ngú inde li Ebhe awo e nakolo pi mbia inde-o. Ní mú ndu ní hana de,† engú bini, ndu ní hana, kute ní adjí lie madji, i tsia kólo na mbia. ⁵² Engú angu-o améne lie bhú nedhinga bedi, maka nakopo ka djila, nedhinga u a'ú toti na soso lie-o. Li a aú lie, okpála inde amu-o azúku ne kute inde i kpí matá-a de. La nganí bhende bhú mukobho-o, kute ní adjí lie na mbia. ⁵³ Padhá de, anga a ayo me kute ní inde nakpi makpi inde-e dji lie, akolo kute inde i kpí matá-a de, i tsia zí la di matá de.

⁵⁴ Nedhinga li kute nakpi makpi-e akólo lie kute i kpí-i de-e, li kute nazí mazi-e akólo lie kute i zí-i de-e, li engú inde u aye e bhú Bhuku gba Ebhe-e tsia kólo

†15:45 Tsia bhú Dje. 2:7.

†15:51 Tsia bhú 1 Tes. 4:15.

mbámhá. U aye bhúbhú me: «Ebhe aha angu kuo aha, kuo matá ade.†»⁵⁵ U aye mata di me:

«Oo kuo! Angu m̄ mo oko pí okpála ne e su?

Oo kuo! Angu mo obhibhili okpála ne e su?†»

⁵⁶ Angu li kuo ngabhili okpála ne e-e, ngayie ka siti 'ngú. Angu li siti 'ngú ngabhili okpála ne e-e, ngayie bhú líli gba Moidje .⁵⁷ La-a, a ayo me ní toko Ebhe inde amene me ní ha angu siti 'ngú di ne angu kuo kabula Ngámá gba ní Yesu Kilisito-o!

⁵⁸ Abhom̄-o, ondaise ma na m̄k̄nda, yi l̄ kpekpeke, u apíte yi de. Yi n̄ nd̄ kpí hana ne kulu gba Ngámá-a ne kalan̄. Yi mbila hana me kulu inde yi ngamene e pí Ngámá-a, n̄ padhá de.

16

Tia inde ayo napo e pí omabhuka na Yelusalema

¹ Ma adjí apa mbo engú inde-e pí yi p̄ndj̄i tia inde yi ngapo e pí omaha Ebhe inde bhú Yelusalema-o. Yi mene matá maka ma aha nako líli lie pí omabhuka na ndu doto na Galatia-o.†² Nd̄ 'kpí yinga hana, a ayo me kpála ne kpála 'o mbo té tia inde aní asia e lí ngongo, nakpata lele bhende lí Ebhe aha e pí aní-o. Yi wo tia bhom̄-o nganda yi, ngú napa me ma gó lie, ní apó matá bhúla tia de.³ Nedhinga ma kólo lie agba yi-e, ma ayé bal̄a p̄ndj̄i tia bhom̄, ma tsia tíma okpála bhende yi alo o bhú ka yi-e ne di ngú nan̄ na'o'o abhú Yelusalema.⁴ I yo me ma n̄ di-e, ya anú ne uo bhú dabilí bini.

Onú inde ayo me Polo n̄ e-o

⁵ Ma agó agba yi p̄ita nakodho 'kpí ka ma bhú ndu doto na Makedonia, anga ma apú bhú ndu doto bhom̄.⁶ Nedhinga koko-o, ní adú mbo ne yi ngú nedhinga bedi.

†15:54 Tsia bhú Isa. 25:8.

†15:55 Tsia bhú Oz. 13:14.

†16:1 Tsia bhú Lom. 15:25-26.

Koko-o, ní adú ne yi oo ngú nadjেকে me nedhinga na zini-e kodho 'kpí. I dɛ me ní nde asi ekpí bhe ayo me ní si e ne yi-e asi-e, yi tsia teteke ma ngú nanɛ li obili bhe ma adjí lie-o. ⁷ Padhá de, anga mbia inde-e, ma kɛnda bha nau yi ne nakodho 'kpí ka ma makodho de. Ma ngabhundja me, i dɛ me Ebhe nde akɛnda-a, ma de go sidi, amba ní bhue mbo ne yi ngengele.

⁸ Mbia inde-e, ma ngabhundja me ma dɛ nga bha bhú Efeso si nakolo bhú 'kpí na Patekote. ⁹ Padhá de, anga Ebhe abhulu 'bho 'ti mɛma mbámá ngú namene kulu gba ani-e ne angu ma hana si, belegɛ li okpála bhelé nde lie ngagɛ kulu ma ngamene e lie-o.

¹⁰ Kaka-a, li Timoté kolo-o, yi mene me ehe bini ato zini bhú ani agba yi oo de, anga ani ngamene kulu gba Ngámá-a maka ma ngamemene lie-o. ¹¹ Kpála bini aú ani bhú djila e padhá de. Yi teteke mangbo ani me ani dhɛkɛ bhú guo 'ngú ngú nakolo li bili ma nde lie-o, anga ma ngadjeke ani ne ondaise ní inde u agó ne o-o.

¹² Li 'ngú bhende atsia ndai ní Apolosi-e, ma ayo ka ani bhɛtsibhɛtsi me ani nɛ agba yi bhú dabili bini ne ondaise ní koko ngú natsia yi. La-a, ani kɛnda nga nanɛ oo mbia inde-e de. Ani sia nedhinga-a, ani tsia nú.

Polo yi matá omabhuka na Kolito mayi

¹³ Yi dɛ li zɛkɛ, yi lɛ kpekpeke bhú 'bu nabhuka , bua yi adú ne tsɛlɛ de, yi dɛ ne angu. ¹⁴ Yi mene ndɛ 'ngú yi ngamene e hana ne mɛkɛnda.

¹⁵ Ondaise ma, yi mbila Etieni ne uo ne piga gba e hana. Yi mbila hana me u adjí nani bua o bhú ndu doto na Akai kalanɛ ngao, u atsia aha lio ngɛbula nateteke omabhuka. Kaka-a, ma ayo ka yi me: ¹⁶ yi manga ongua okpála bhomɛ-o mamanga. Yi manga di okpála inde ngamene kulu ne kekele bhú dabili bini ne uo mamanga.

¹⁷ Ma ne djali naali li nago nako ka Etieni, ne Folotunasi ne uo ne Akaikusi-o. Ma ngau uo lie, a mana mɛgito me ma ngau yi ndɛ yi hana. ¹⁸ U ato masi bhú ma maka u ato di nako masi bhú yi lie-o. Ongua okpála bhomɛ-o, a ayo bha ndjɛ namanga uo mamanga.

¹⁹ ODadjua gba Ebhe inde bhú ndu doto na Adjia yi yi ma yi. Akwila ne Pilisila

bhú dabilì bini ne omabhuka inde ayoyo Ebhe agba uo-o, yi yi ne 'lì Ngámá mayi.

²⁰ Ndá ondaise ní inde ei hana yi yi ma yi. Yi yi li yi sánda yi ne nakama liyi li káte yi.

²¹ Ma yi yi ma yi. Engá inde ma aye e me ma yi yi mayi bhómá-o, ma aye ne 'kpa ma makpe. ²² Í dá me kpála nde kánda Ebhe de-e, u de tá pèdjè li ani! Malanata: a ayo me Ngámá gba ní-e gógo! ²³ A ayo me bádha bhú 'bu gba Ngámá Yesu-o dá bhú dabilì bini ne yi. ²⁴ Ma kánda ndá yi hana naali ka ní akpètse liní ne yi liè bhú 'bu Yesu Kilisito-o .